

Wijalangasakya'

Jonimi Wijalangasakake'nesi.

1 ¹ Sinnawi yagaala datha' lika yulyarakesi. Yi Jizaazai Kiraazitiyai ku'maayaba marima'naabakesi. Sahwai neminyine'na yoimavakesi. Gotiyai daza' Jizaazari yimwangakesi. Jizaazai gannya yaasiwa'wawinyaraavina yibwaridaakwa'ne' yime'nya'bi' yima'nadenna wijaavakesi. Sai neminyina kunya, yawisa nejaavani' yuya dazanna dare. Sai gamire mamaayari ejeliyari Joninnyawinna maryasaaba'. Nimi gamire yaasiwa'wawinyainyina yi sai yagaalya' nyijaava'. ² Nimi Joninnyi yuya dazangi tinna mena wangamwa. Yi nimi tinna wanganene yunebanna Gotiyare yagaalya' ku'maayaba jalikurakivanige. Yi yagaala Jizaazai Kiraazitiyai nyijalikurakaka daza'na jalikurakivanige. Nimi dara divanige. Yagaala daza' yi nebulyasi. ³ A'mwei Gotiyare yagaala datha dividaa'nya yima'nade wanganadadelyi nabaai yagaala Gotiyari wi'nawijiwaakadinya a'mwe yi'bwa'nawi'nadivisara kadika wi'nadivi' sahvara Gotiyare yagaala yida'mwe datha' sara mididivisaraji yilaaya yadivi' tewaanaanga winaderera. Sare' dare'nanyi. Gotiyai mena dake yida'manige datha yima'nadehaa' yi sagaa' maalikegaaki.

**Kiraazitiyare kusilaanyangiya anga ata puridaa'nyi
pwaraalayangina Joni yidavake'nesi.**

⁴ Kiraazitiyare kusilaanyangiyaihi anga ata puridaa'nyi pwaraalaya sabanyaihi!

Nimi Joninnyi yagaala datha' sarimi Eziya simagi mwaaihasaihirina yida'mwesi. Dahaa' Gotiyai mwaalikei, sahwai kigaakuna kuna mwaalakei, dividaa'nyi kuna yima'naabathei yi sahwai sariminyi yange'na yihigaimwagana! Sariminyi kwaamu'nanyabwi yihyana! Nabaai Kurya ata puridaa'nyi pwaraalayara (Kurya Nawi'nya Naangei) Gotiyare kinginamwaalyisavi daakasara sariminyi yange'na yihigaimwabika! Sariminyi kwaamu'nanyabwi yihyipika! ⁵ Nabaai Jizaazai Kiraazitiyai sai Gotiyare yawita yuya nebulya'na yida'na jalikurakadei sai aaya

mudi'nanyai a'mwe bainikeraayawi ayina dikaavakei sai kingiya yuyara Kwaakevaki mwaaihasaraavi maremwaaidei yi sai sariminyi yange'na yihigaimwagana! Sariminyi kwaamu'nanyabwi yihyana!

Sai neminyi kale yange'na neyadei, yi sai gamire tawe savi nemire kayaa'nanyanna marasi'nakelyi. Kayaa'nanya sa nevwiyinikeina mamwaaalya'ne'na balakelyi. ⁶Sai neminyi maremwaidaanayinaavi nemwaaahada yi Gotiyari gannya Ganimaangeri widaaya'neina Gotiyarina mubithika yira'daanyaina “Su! Su!” widadaa yilaaya wiadaa gaminyi makidaa yadaanyinaavi nemwaaihakelyi. Sasarerine yaya naange' byaanna naangesi diraginna ya'nebulyi yuyagaa' yuyagaa' kuna warana! Sahirisira. Nebula naangesi.

⁷Yithaanyi! “Sai yiraayavi waimanaabiko.”

Yuyaraavire tinnyaraalyi sahwari wangabi'derineri.

A'mwata wilivadaakweta kwaraji wangabi'derineri.

Malimwagyara yita yuyavakaaviyara wangabi'derera.

Sahwara siduta kwalaalya yawipi'dere.

We! Gaminyine like'na jakinna dipi'dere.

Yo! Sahirisira. Nebula naangesi.

⁸Naangei Gotiyai dara divani! “Nimi yune sahwainyi aaya sinnawinne nebulya'nanyainyi (A). Nabaai wana nebulya'na aaya divineinyi (Z). Sinnawinyainyi. Ayaangeinyi.” Yi dazai dahaa' mwaalikei kigaakuna kuna mwaalakei dividaa'nyi kuna yima'naabathei sai Diraginya Yuyangi Aaya Kaavilyalyi. Yuyangi Minyaginyalyi.

Kiraazitiyari A'mweraavine Kaimiraayari Joni tinna wanganake'nesi.

⁹Nimi Joninnyi sariminyi sirya'mweinyi. Nimi sarimiji Jizaazari taanginyaviji Gotiyai nemaremwaaideviji taanga nejaavadivi' diraginna da'daanyaburiji sangi ye'mwannamwaaidinyainyi. Sareinyi Gotiyare yagaalya' wijiwakamarye'naji Jizaazarina jalikurakene'naji Ahu'manna Paatimozi wo'nikeba kalavuzi nyimaaresainyi. ¹⁰Yirika Naangeregaa' (Kiraazitiyarina yi'bwa'nawi'nadaanyagaa') Kuryai niminyina diraginna bulamwaina nyiwa'. Sara nyadaa'nyi niminyi dusidaasi nimi maangwiraaya piri' wi'nyina. Maangwiraaya sa' jaka diraginna dina pihuliyavire jake'bisa!. ¹¹Maangwiraaya daza' dara dina “Yuyangi tinna wangamaniginya, sa gimini nayaa pikarya jitha! Pikariyikwiavi ya'gizi anga ata puridaa'nyi pwaraala dangine Kiraazitiyare kusilaanyangiyaraavina jaasi! Yi Anga Epazaaziji Simenaaji Pehamaamiji Taayataairaji Saathiziji Pilathelipiyaji Layothiziyaji anga sangina dimarayaasi!”

¹²Nimi “A'mwe yagaala nyidivanika sari wanganima!” dena ginyiwannyina. Mena ginyiwannyina yena yi laamivananya' yilakya'ne goliya ata puridaa'nyi pwaraala sa wa'di'nyiya tinna wanganna. ¹³Yi

a'mwe pwai laamivananya' yilakya'ne dazangi tinnyaba daa'di'nyi nimi tinna wanganna. Sai yi a'mweraavine kaimiraayaibisai. Sai baazi'ma'nya saaminaange' yune sivila kedivi yalawakinanya' baazi'ma'nakei, yi sai munnaanya goliya' gannya kihisavi pwiynakei. ¹⁴ Gannya minyaginyavi mijasa' yune nebulya'na yaake'nanya', sipizipiyavire arilya'bisa' yi wivitirata yaake'bisa'. Yi gamire tinnyai ditaalisa'bi' yidadaasi. ¹⁵ Yi gamire sivilyiraai wana nebulya'na di'baaka mwadadaasi, aringa kwaari'mata biraaziya' dika naangevi yira'divitabaabisirai. Nabaai nimi kadika wi'niwe' gamire yagaaimaangwiraaya' aalijaka naange' yinnadevaabi' kinniwa' wi'niwa. ¹⁶ Sai aangasiri silingaaminya ata puridaa'nyi pwaraalya limwagari'. Yi kwaari'masiraminya piri' gurimaanga yuyimaginyaai yinike' sa' gamire maangevidaasi waraka mwasaba walyaabinike'. Nyilyai sirigwajahaa' nyila diraginna dadevaaibi' gamire sinnyi' baaka naange' wimwadiwa'.

¹⁷ Sahwari nimi tinna wanganena lika yena gamire sivilyiraaryaba wala'na. Yi nimi wana a'mwe mena bainikeibisainyi. Sara kye sai niminyi aangasi yilanyakaka dina "Gimi lika kuna minnera! Nimi aaya sinnawinya nebulya'nanyainyi. Yi nimi aaya dividaa'nya nebulya'nanyainyi. ¹⁸ Yi nimi gaala mwaalya'nebwi aaya kaavilyainyi. Yithaa! Kigaa' nimi mena baleinyi, kiri', yithaa, yuyagaa' yuyagaa'ne gaala mwaaiheinyi. Nimi barya'ne kiya' limwaga'di Bainikeraavire Angebanne kiya' limwagake. Yi sareinyi diraginnakeinyi 'Aawa,' kada'muji a'mwe pwai mabalyi yadelyi. Pwai bainikei bainikeraavireba yagalya'ma'na yadelyi. Nimi 'Yo,' kada'muji pwai balina yadelyi. ¹⁹ Sarevidaa'nyi yi gimi pikarya nayaa jitha! Yagaala gimi tinna wangamwaanyangine' yi dahaa' warikenginesihini dividaa'nyi yima'naabathennaji jithaka! ²⁰ Yi gimi tinna wangamwaanya silingaaminya ata puridaa'nyi pwaraala daza nimore aangasiri wa'disiyannaji laamivananya' yilakya'ne goliya kininnaka ata puridaa'nyi pwaraala dazannaji yi Gotiyai yoimavajalikurakya dazanne aaya kaavilya' daresi. Silingaaminya ata puridaa'nyi pwaraala daza yi sa Kiraazitiyainyire kusilaanyangiyara anga ata puridaa'nyi pwaraalyangi mwaalyaraavire mamaayara. Yi laamivananya' yilakya'ne golinaka ata puridaa'nyi pwaraala daza Kiraazitiyainyire kusilaanyangiyara anga ata puridaa'nyi pwaraala sangi mwaalyare."

Anga Epazaazina yagaalya' yida'nike'nesi.

2 ¹ Kiraazitiyainyire kusilaanyaviya Anga Epazaazi mwaalyaraavine ejeliyai mwaalikerine pikarya nayaa dara jitha!

Silingaaminya ata puridaa'nyi pwaraalya gamire aangasiri limwaga'dei sahwai laamivananya' yilakya'ne golinaka ata puridaa'nyi pwaraalyangi tinnyaba kaanya yamaryade sahwai yagaala datha githasivanaabi'.

²Gimi wawinya yadinya yuya sabwina mena gyawirangamanige. Yi gimire yagiyagiwawinyannaji taangegaa' gimi diraginna daaya'nebwinaji mena gyawi'manige. Yi gimi a'mwe kayaa'nanyaraavina “Aala!” nebulya'na diwaa. A'mwe dazara giminyi dara githadivisare “Nemi Apozeliya Nedaasade kwainera.” Kiri' aawa! Sahwara Widaasadera mi'. Yi kumire yagaalya' mena yawibwarangamwaa. Yi kumi yadivita saburi kaavilya' mena birama'mwaa “Yi sahwara a'mwe yune kwaasiyare.”

³A'mwera tinna gwangadaapi, gimi nininne yaya' kuna limwamanigi. Yi sahwara wana kayaa'na gyadaapi kiri' gimi diraginna daa'di taanga daza' maa'dinyi. Yagiyagi wawinya daza'na maa'na ginnadeigi mi'.

⁴Kiri' giminyina nimi yagaalya' kininnaka dareinyi. Sinnawi gimi mudi'na diraginna limwagahinyagaa' yi dazagaa' niminyinaji nebulya'na givu'nakeiginyi. Kiri' dahaa' aawa. ⁵Sinnawi nawi'nya tewaanyabwi yaginyaiginyi. Kiri' gimi daza' yagalya'mavaginegaa' yi gimi mena wala'mwaawinyaiginyi. Sarevidaa'nyi ayahi sinnawi gimi yaginya dazabwina nayaa jawi'! Yi gimire simunyabwi mudikebwi nayaa jawiramaa'! Yi gimi aaya mudi'nanyagaa' yaginyabaabisabwi ji! Nabaai aawana, yi nabaai gimi simunya mudikebwi ayina yawiramaata mija', yi nabaai nimi giminyawinna bi'mava'muji yi gimire laamivananya' yilakya'ne' warikebadaa'nyi marasi'nidesi. Simunya mudikebwi myawiramaari nyidika! ⁶Kiri' dasare dathavwi kuna gwari'. Gimi Nikolaazare mididivisaraavire saburi yikamaanga wiadinyaiginyi. Nimi kwainyiji sahwaravire saburi yikamaanga wima'nadeinyi. ⁷A'mwei kadi'nakei, sai yagaalya' kadika nayaa wi'nana! Yi yagaala daza' Kurya Tewaanyai Kiraazitiyainyire kusilaanyangiya anga geva gevanyaraavi wijiwaakivanikesi. Nabaai a'mwei mala daza' wawilavajai, sahware yi nimi “Ya,” wididelyi. Yi sawhai a'mweraavina gaala wijaaya'ne yita dazari tika munne maaradelyi. Yita dazai Gotiyare wawinyavi Parathaazi waayi'.

Anga Simenaa mwaalyaraavina yagaalya' yida'nike'nesi.

⁸Kiraazitiyainyire kusilaanyaviya Anga Simenaa mwaalyaraavine ejeliyai mwaalikerine pikarya nayaa dara jitha'!

Sahwai aaya sinnawinya nebulya'nanyai nabaai aaya dividaa'nya nebulya'nanyai aayaangei kigaa' mena balakei kiri' gaalyai ayina yima'naabakei yi sarei yagaala datha githasivanaabi'. ⁹Taanginya gima'nivanikennaji nebulya'na gilyivita wana kuneigi mwaidaa'giyabulyi gyawirangamanige. Gilyivita kuneigi kiri' gimi pini kwalaalya kininnakeiginyi. Nabaai yagaabiraizika daza'na a'mwe pwara sahware giminyi givanigasa'na gyawirangamanige. A'mwe dazara sahware dina “Nemi sawhaina Juyaraavidaasaine.” Kiri' sahware nebulya'na Juyaraavidaasarana mi'. Aawa. Juya kwara kiri' sahware

yune Saataanimirevaasiyaraavina. ¹⁰ Divi maalikegaa' gimi daange dimaa'dengina lika minnera! Yithaa! Saataani sai Yuyaraavi Kotiya Maryadei jida'daa'nyi sarimijiya pwaraavi kalavuzawimwaahipi'dere. Sariminyi yaamiji yijiwaala'ne' sara yihyipi'deihilyi. Yi yirika ata yuyiraalya yinigejaa' sarimi Kiraazitiyareihiri taanginya yihizaavipi'deihilyi. Kiri' niminyina nayaa dilimwaga'! Kuna kuna yiwo'gizi yune gimi baidizagaa'na yi nabaai gaalya' yivarula naw'i'nyai givwatavideinyi. (Kingimwaa'hi'nya' gwakideinyi.) ¹¹ A'mwei kadi'nakei sai yagaalya' kadika nayaa wi'nana! Yi yagaala daza' Kurya Tewaanyai Kiraazitiyainyire kusilaanyangiya anga geva gevanyaraavi wijiwaakivanikesi. A'mwei mala daza' wawilavajai sahwari yi ayahi barya sa' kayaaka yigalakadei mi'. Aawa nebulyasi.

Anga Pehamaami mwaalyaraavina yagaalya' yida'nike'nesi.

¹² Kiraazitiyainyire kusilaanyaviya Anga Pehamaami mwaalyaraavine ejeliyai mwaalikerine pikarya nayaa dara jitha'!

Kwaari'masiraminya piri' gurimaanga yuyimaginyaai yinike' kininnakei yagaala datha githasivanaabi'. ¹³ Angeba mwaaihiyaba anga dazaba Saataani kingiyai maremwaalikebanna nimi yawirangamanige. Maremwaalika kiri' gimi niminne yaya' diraginna limwaga'dinyaiginyi. Yadi gimi niminyina diraginna limwadi yi diraginna limwanga daza' lika yulyakadinyaigi mi'. Nabaai kigaa' a'mwe Adipaazai niminyina nayaa nebulya'na jalikurakadei sarimiji ye'mwannayihimwaalaka sahwari sariminyaba tamakesagaa'na niminyi kuna diraginna limwagakinyaigi. Niminyina "Aala!" majahinyaigi. Anga dazaba Saataani mwaaida gannya wawinya' yivanikeba kiri' sara yadinyaigi. ¹⁴ Kiri' nimi giminyina yagaala piri' piri' kininnakeinyi. Yi sarimijiya pwara kwaasiwi'nawijiwaakya Belaamimirebwina limwaga'divisara kininnakeiginyi. Belaamimirebwi yi daresi. Sinnawi kigaa' Ne Mozizaregaa' sai maremwaalde Belaakimi dara yibwaridaakwa'. A'mwe Yizireliyaraavi kwaasi yijiwaalyabwi dahe'bisabwi kya' a'mwe sara wagilyavi walaraawe'. Yi Belaakijiya Yizireliyaraavi yidikaave'. Yi sahini kwaasigotiyaraavi yidika yesa tika nya'na sahwaraavi yina yeva yaasiwa' pamarinyabwi ya'na yidikaavesare. ¹⁵ Sasarebaabi' gimijiya pwara Nikolaazare wijiwaakya' limwaga'divisaraji kininnakeiginyi. Baa'nana! ¹⁶ Sarevidaa'nyi yi gimijiya pwara "Simunyabwi mudikebwi nayaa jawiramaa'!" Nabaai aawana, sara myijaiginyawinna yarai bi'mavideinyi. Yi nimi a'mwe dazaraji kwaari'masiraminya nimore maangevi nyarika dazasi mala barannaadeinyi. Kiri' gimire tewaanyabwina gyawirangamanige. ¹⁷ A'mwei kadi'nakei sai yagaalya' kadika nayaa wi'nana! Yi yagaala daza' Kurya Tewaanyai Kiraazitiyainyire kusilaanyangiya anga geva gevanyaraavi wijiwaakivanikesi. A'mwei mala daza' wawilavajai,

sahwari tika wapaa manaaya Sigunyabanya pini dahaa' kima'nyawi lika yulyarike wijaavidelyi. Nabaai nimi sitihwawinya yaaka pimili' wijaavidelyi. Yi tihwawinya dazamiliki yaya mudike' yida'nikemili' wijaavidelyi. Yi aawa, a'mwe pwai yaya daza' yawiranganadei mi!. A'mwe tihwawinyamili' maarajai yi yune sahwaina yawiranganadelyi.

Anga Taayataaira mwaalyaraavina yagaalya' yida'nike'nesi.

¹⁸Kiraazitiyainyire kusilaanyaviya Anga Taayataaira mwaalyaraavine ejeliyai mwaalikerine pikarya nayaa dara jitha'!

Gotiyare Gawaalivaangei sai tinna ditaalisa' naanga yidamakida yidaderaai kininnakei sivilyi wana nebulya'na di'baaka mwadadaasi kwaari'mata biraaziya' dika naangevi yira'divitabaabisi kininnakei yagaala datha githasivanaabi!. ¹⁹Gimi yivaniginya yuya saburana, gimi a'mweraavina tewaanya givu'nivanikebuluyi niminyina diraginna limwaga'maniginnyabulyi yi a'mweraavi gaimwagya'ne widaayivaniginnyabulyi yuya taanginya gima'nivanikengi diraginna daa'maniginnyabulyi nayaa gyawirangamanige. Nabaai dala pibwinanya sabwi gimi aayagaa' gaai nyilimwagahinyagaa' yaginya sabwi sa' tewaanyasi. Yi dahaa' diviya sa' yi sinnawinyavi wavila'mwaka wana tewaanya nawi'nyaangesi. Sare' gyawirangamanige. ²⁰Kiri' giminyina nimi yagaalya' kininnaka dareinyi. Gimi a'mwe daza' Jezeveliya' gimiji ye'mwannemwaaidevi yaasiwa'na baihana'na yadinyasi. A'mwe daza' kwaasi dara dadesi “Nimi piropetiya'nyi. Gotiyari wi'nadi a'mweraavi wijiwaakadinya'nyi.” Sara dada nimore yaasiwa'wawinyaraavi kwaasi wijiwaakina. Yi sahwara yaasiwa' pinamarya sabwi midinya'naji yi miwita kwaasigotiyaraavine yidika yadivisa tika nya'naji kwaasi wijiwaakina. Sasare dazaburi sa' wana kwaasiya' nimore pwara sara yadivisasi. ²¹“A'mwe sa' simunya mudikebwi yawiramaarana!” yawirena pigaa'nevi yaamiji yena yemwaaimanige. Kiri' aawa. Sa' simunya mudikebwi yawiramaasa'na “Aala!” divani!. Gannya yaasiwa' girikita'nanya yade sangina bule' wijaaya'na “Aala!” dina. ²²Yithaa! Nimi nalabwaryavi a'mwe dazavina daangesi nalaaya naangesi wijaavidesi. Yi a'mwe dazara sahirisi girikita'nanyabwi yadivisara sahwara simunya mudikebwi yawiramaata myapiji gami yade sabwina bule'na mujaayi yipija' yi nimi daanga naangeji taanginyaji wijaavidere. ²³Gamire kaimiraaya kwaraaviji yi nimi yuna tamakidere. Sarevi yi Kiraazitiyainyire kusilaanyangiya yuyavaka nayaa yawipi'de'nanyi. Yi nimi a'mwe yuyaraavire munyikaaviji simunyangiji nayaa maryawibwa'dinyainyi. Yi nimi sariminyi gazaigizaiginyi yiniga wi'na yadivita sabwine' yihirivikirideinyi. ²⁴Kiri' sarimi pwaihiri yihithivanige. Sariminyi kwaihi Taayataaira mwaalya pwaihi a'mwe savire yagaala daza' mididivitaihi mi!. Yi sarimi sasare dazabwi dara

dadivisaburi “Yagaala yune kusawi nebulya'na Saataanimire sabwi,” yawiramaa'divitaihi mi'. Yi sareihiri dara yihithivanige. Yi nimi naanga piri' yihwakideinyi mi'. ²⁵Aawaawa. Sarimi limwaga'divita sabwi yi kibwi nayaa diraginna dilimwagyila! Kuna yiwopiji yune nimi bi'mava'mujiyagaa'na diraginna dilimwagarila!

²⁶A'mwei mala daza' wawilavajai, a'mwe nimore wawinya midinoji yune gamire aya yiwiya yajahaa'nei yi sahwarina nimi diraginaange' wijaavidelyi. Diraginya sa' daresi. Sai minyaginyai ajimya yuyangiyaraavi maremwaaladevurinera.

²⁷“Sai yita kwaari'mayaginyari' limwagozi
A'mwe saraavi diraginna maremwaaladelyi.
Maa'gula kwadike mala tadaapi
Pwaki'da yaaye liliya wa'devaaibisasi.”

Niminyina Nimwai diraginya' maremwaalya'ne' nyijaavakabaabi' diraginya sa' wijaavidelyi. ²⁸Yi nabaai nimi silingaamina mwanayagaa'ne kaabwe' wijaavideinyi. ²⁹A'mwei kadi'nakei sai yagaalya' kadika nayaa wi'nana! Yi yagaala daza' Kurya Tewaanyai Kiraazitiyainyire kusilaanyangiya anga geva gevanyaraavi wijiwaakivanikesi.

Anga Saathizi mwaalyaraavina yagaalya' yida'nike'nesi.

3 ¹Kiraazitiyainyire kusilaanyaviya Anga Saathizi mwaalyaraavine ejeliyai mwaalikerine pikarya nayaa dara jitha'!

Sahwai ata puridaa'nyi pwaraala Kurya Gotiyareraji silingaamina ata puridaa'nyi pwaraala dazaji kininnakei yagaala datha gimaryasivanaabi'. Gimi yivaniginya yuya saburana mena gyawi'manige. A'mwera giminyine yaya' dara dadivisare “Kiraazitiyarera angeba mwaalya dazara gaalya' kininnakera mwaaiha'.” Kiri' aawa. Mena Gotiyarina bainikeiginyi. ²Naangevaa'gi se warya' yagalya'mava'gizi tinna nayaa baihanarya'neigi dithikaaka! Gimire yuya sabwi kuna maali'na warike yuna nabaladika! Yuya sabwi baimanikebwi nayaa diraginya jivaimwa! Sare' dare'nanyi. Gimi yadinya yuya sabwi pirivi sa' yuya yida'nanya' nimore Gotiyare tinnyari nimi tinna mwanganabirivanige. ³Sarevidaa'nyi yagaala tewaanya dazavi kadika mena wi'naginyagaa' gimi limwagasabwi maaraginyabaaibisa' ginnya simunyavi nayaa ayina jawi'! Daza'na ya'gizi sabwi nayaa mididi simunya mudikebwi yawiramaa'! Savidaa'nyi se' myagalya'mayija' tinna nayaa baihanarya'neigi madikaayi yija' a'mwe kukei bi'ma'devaaibi' nimi giminyawinna bi'mavideinyi. Nabaai giminyawinna bi'ma'mujahaa'na gimi jawi'deigi mi'. Arikewinyi. ⁴Kiri' maalikevaa'gi yaya pinijiyara Saathizi mwaaihata pwai pwai kininnakeiginyi. Sahwara kumire baazi'ma'nya girika yigalakadivisara mi'. Kumi dazara yi nimore baazi'ma'nya yaake' baazi'ma'napi yi nimiji ye'mwannayamaryadere. Sahwara sahirivi

Yiniga wi'nannere. ⁵Nabaai a'mwei mala daza' sara wawilavajai sahware nimi avaananya baazi'ma'nya yaaka dathavaaibisa' wakidelyi. Yi nabaai nimi bukuya gaala'ne siri gaminne yaya' yiwaipiwagideinyi mi'. Arikewi. Yi nabaai Nimaamaangeryaba gamire ejeliyaraayabaji nimi a'mwe dazarine yaya' jalikurakideinyi. "Nimirelyi," wididelyi. ⁶A'mwei kadi'nakei sai yagaalya' kadika nayaa wi'nana! Yi yagaala daza' Kurya Tewaanyai Kiraazitiyainyire kusilaanyangiya anga geva gevanyaraavi wijiwaakivanikesi.

Anga Pilathelipiya mwaalyaraavina yagaalya' yida'nike'nesi.

⁷Kiraazitiyainyire kusilaanyaviya Anga Pilathelipiya mwaalyaraavine ejeliyai mwaalikerine pikarya nayaa dara jitha'!

Sai nawi'nya nebulya'nanyai, yi nebulya'nanya sabwina aaya kaavilyalyi. Sahwai Kingiya Devitimine kiya' kininnakei kaadihita naange' baasadelyi. Basadaa'ny'i gamire wawinya' naanna jithe'nanyi. Yi a'mwe aane pwai kwai kaanya sa' ayahi tihiradei mi'. Yi kaanya' tihidelyi. Yi a'mwe aane pwai kwai ayahi baasadei mi'. Sarei yagaala datha gimaryasivanaabi'. ⁸Gimi wawinya yadinya yuya sabwina nimi mena gyawi'manige. Yithaa, gimire sinnyiki kaadihisa' basinadaavike' wakiwesi. Yi a'mwe kaanya tihiradei aane pwai kwai mi'. Nimi dara yawi'manige. Gimi diraginya maalike' kininnakeigi kiri' nimire yagaalya' mididi yi nimirne yaya' lika yulyakadinyaigi mi'. "Sahwareinyira," widadinyaiginyi. ⁹Yithaa, nimi Saataanimire a'mwe yita dathavaa' giminyina gimwangideiginyi. Sahwara dara dadivisare "Nemi Juyaraavidaasi yisavaa'ny'i." Kiri' sahware Gotiyarera mi'. Aawa. A'mwe kwaasi dadivisare. Yithaa! Yi nimi a'mwe dazara gimire siviliyaraaryawi kwaakewi bulawila'napi'de'na yideiginyi. Yi sahware yawipi'de'na "Gotiyai sahwareavina tewaanya nebulya'na mena wivu'nivani'." ¹⁰Nimi diraginna daavebaaibi' nimire yagaalya' nyimididi yuya taanginya gima'nade sangi gimi diraginna daa'dinyaiginyi. Yi sare'na yijiwaala daza' "Kwaaka yuyawi yima'nima!" dozi yajahaa' a'mwe yuyara Kwaaka yuyawinyaraavi yijiwaalya'negaa' sa' yi giminyi nagima'nadi'! Yi yadevi nayaa gimaremwaalideinyi. ¹¹Yi giminyawinna yime'nya'bi' walaabideinyi. Yi aane pwai kwai kingimwaa'hi'nya' gimire tivikisa' nagimarasi'nadi'! Gimi dazabwi limwaga'maniginya sa kuna nayaa diraginna dilimwaga'! ¹²Nabaai a'mwei mala daza' sara wawilavajai, yi sari dihibya anga nawi'nya nimire Gotiyarevi diraginya yiwagya'neri nimi maridaakudelyi. Yi nabaai sai anga nawi'nya savi myagalya'mayi yoji ayahi mwasilaanna walyawodei mi'. Arikewinyi. Yi sari nimi nimire Gotiyarine yaya' yidavidelyi. Yi nimire Gotiyare anga naangebanne yaya' yidavidelyi. Anga naanga daza' yi Jeruzaalemi mudikesi. Sa' yi nimire Gotiyaryabadaasi walaabathesi. Yi Sigunyavi yagalya'mavoji

walaabathesi. Yi niminne yaya mudike' sa' kirisi yi sari pikarya yidavidelyi. ¹³A'mwei kadi'nakei yagaalya' kadika nayaa wi'nana! Yi yagaala daza' Kurya Tewaanyai Kiraazitiyainyire kusilaanyangiya anga geva gevanaraavi wijiwaakivanikesi.

Anga Layothiziya mwaalyaraavina yagaalya' yida'nike'nesi.

¹⁴Kiraazitiyainyire kusilaanyaviya Anga Layothiziya mwaalyaraavine ejeliyai mwaalikerine pikarya nayaa dara jitha'!

Sahwai Nebula Naangei, nebulya'ne aaya kaavilyai, Gotiyare yawita yuya nayaa limwada nebulya'na yida'na jalikurakadelyi. Yuya Gotiyai wakyaakengina aaya kaavilyalyi. Sarei yagaala datha gimaryasivanaabi'!

¹⁵Gimi yivaniginya yuya sabwina nimi mena gyawi'manige. Gimi yirila majivanigi. Yi niminyina “Aala!” majivaniginyaiginyi. Nabaai gimi dika magimani'. Yi niminyina diraginna myivaniginyaiginyi. We'! Dara githivanige. Gimi di'nakeigi mwaaidizi kwaji wikira. Gimi yirijaigi mwaaidizi kwaji wikira. ¹⁶Kiri' aawa. Gimi di'naka maali'na gimanikeiginyi. Gimi di'naka nebulya'na maginyivani'. Yi gimi yirija nebulya'na maginyivani'. Sarevidaa'nyi aalya di'mudinya maalika kininnake'bi' sareiginyine'na nimire maangevidaa'nyi wirya gimudakideiginyi. ¹⁷Sare' dare'nanyi. Gimi dara dadinyaiginyi “Nimi kwalaalya kininnakeinyi. Yi nimire gilyivita kwalaalya wari'. Pininna manyigainyivani'.” Kiri' giminyina aawa. Gimi wana kayaa'na mwaaihi. Yiniga wi'na giminyina kale nyadeiginyi. Gimi wana gilyivi'maaya yinahune nebulya'nanyaigi mwaaihi. Yi gimi tinna tibinyaiginyi. Yi gimi kilaakeji'nanyaigi mwaaihi. Yi nabaai gimi saigi dazavi myawiranganyivanigi. ¹⁸Sarevidaa'nyi nimi simunya datha' gizaawa. Nimire goliya', sa' nawi'nya tirimaaya yima'nyavina dike' nake' diraginyasi. Yi gimi goliya daza' dimubi! “Gotiyarine kwalaalya kininnakeinyi yima'nima!” da'gizi sara dimubi! Yi gimire kilaakejiki baazi'ma'nya'ne' nimire baazi'ma'nya yaake' dimubi! “Yi baazi'ma'nya yaaka sa' yewaa'bwa'nima! Yi nabaai kilaakeji'nanyainyi kuna mamwaalyi yadi wagila nanyivwa'nadika! A'mwera a'mwemilika tinna nanyangabithika! Yida'maraanga sabwi baazi'ma'nima!” da'gizi sara dimubi! Yi gimi nimire minariwelivananya' gimire tinnyaraari pu'nya'ne' dimubi! “Yi sareinyi tinna yiniga wi'na wanganima!” da'gizi sara dimubi! ¹⁹Nabaai nimi a'mwe nyivu'nadaasiya yuya saraavi maanga widadi sahwaravai kumire yadivisabwi yavada'gaidinyainyi. Sarevidaa'nyi yi gimire sabwina simunya mudikebwi jawiramaa'! Nabaai simunya nawi'nya' dike'bi' kuna jawiribaina! ²⁰Yithaa! Nimi kaadihisavi daake. Yi nimi mala tamida'nivanaabihe. Nabaai a'mwe pwai nimire maangiki nyu'noji yi kaanya sa' nyibasamaraabazai yi nabaai gaminyi kusawi wila'muji salyi wilye'mwannamwaalidelyi. Salyi tika ye'mwannanidelyi.

Yi sai nimiji tika ye'mwannanadelyi. ²¹Nabaai a'mwei mala daza' wawilavajai, sahvari nimi "Ya," wididelyi. Sai namwaalyita kingiyavi nawi'nyaba nimiji nye'mwannamwaalade'na wididelyi. Sinnawi nimi kwainyi malya' wawilavebaabi', yi nimi Nimwalyi gamire namwaalyita kingiyavi ye'mwannemwaalebaabi' nye'mwannamwaaladelyi. ²²A'mwei kadi'nakei, sai yagaalya' kadika nayaa wi'nana! Yi yagaala daza' Kurya Tewaanyai Kiraazitiyainyire kusilaanyangiya anga geva gevanyaraavi wij iwaakivanikesi.

Gotiya Sigunyaviyarina yilaaya ya'nerinesi.

4 ¹Sa' mena kya' sagaa', yithaanyi, Sigunyavi kaadihita piri' basinadaata yadisi nimi tinna wangamwe'. Yi maangwiraaya daza' sinnawi nimi kadika wi'ne sa' pihuliya'bi' jaka diwa'. Dahaa' sa' dara nyidivani' "Munya davanna jilaama! Giminyi yuya dividaa'nyi yima'nadenna givwaridaakudeinyi." ²Yi yime'nya'bi' niminyi Kurya Tewaanyai diraginna bulamwaaina nyiwa'. Yithaanyi, Sigunyavi saba kinginamwaalyita piri' daa'di'nyiya' tinna wanganna. Nabaai pwai yuyaraavi maremwaalya'nei namwaalyita dazavi yilamwaaidi'nyi wanganna. ³Sahwai sila nawi'nyai baake' yidada sila nawi'nya wayaakei baaka yidadaa'nyiyabaaibisalyi. Kinginamwaalyisavi byaawila piri' yagi'ma'nikeri sila nawi'nya yijuzai baaka yidadei tinna wanganna yiwelyi. ⁴Kinginamwaalyita dazayaba kinginamwaalyita pini yagi'ma'nata yadi'nyi wanganna. Namwaalyita tiwedipoya sangi a'mwe naanga tiwedipoyara mwaalina. Sahwara baazi'ma'nya yaake baazi'ma'nevera. Yi kingimwaaihi'nya goliya kumire minyaginyangi kininnakera. ⁵Yi kinginamwaalyisavidaa'nyi yinamiraasavire di'baake mwasabi' livapina yaka purinya yinnyina, yi pa'da yinnyina, yi yi'munya pilina. Nabaai kinginamwaalyita dazavi sinnyiki di'baaka ata puridaa'nyi pwaraalya dika yida'nyina. Di'baaka daza sa Gotiyare Kurya ata puridaa'nyi pwaraalyarera. ⁶Yi kinginamwaalyisavire kusimagi naanga saalaalya'bisa' wari'. Daza' yi sinimwavanakurika naangebisa', yi wana giri'maaya nebulya'nanya' sigujaaka sirimya'bisasi.

Yi tinnyaba namwaalyisavi daraai daraala gaala kininnakera daavina. Yi sahvara kinginamwaalyita dazavi dakwagi'maveva yi daavina. Daraai daraala dazara gaala mwaaleva kumire tinna kwalaalya kininnakeraavi kusimaginyaviji dusimaginyaviji yunewinna bwakuke. ⁷Gaala kininnaka aaya mudi'nanyai yi sai laayoniyaibisai. Yi sahvari yawidaasi gaala kininnakei yi sai bulimakaawoya kwalyaibisai. Yi sahvari yawidaasi gaala kininnakei sai a'mwere sinnya'bisa' kininnakei. Yi sahvari yawidaasi gaala kininnakei yi sai bwaangya pwai pilavamaryadaa'nyiyaibisai. ⁸Daraai daraala gaala kininnaka dazarajiya gazaizai piya ata puridaa'nyi pwainanya kininnakelyi. Yi tinna kwalaalya

yunewinna mwasimagiji kuta kimagiji bwamwaihukera. Yi yirikeviji sawisaviji sahvara daata dara dadivisare:

“Naangei, Gotiya Diraginya Yuya Kininnakei
Giri'maayalyi. Giri'maayalyi. Giri'maayalyi.
Tewaanyalyi. Tewaanyalyi. Tewaanyalyi.
Gaminyi jaanna marinawaadelyi.
'Gimi gaveiginyi. Nemibitaigi mi'.
Sinnawi kigaa' sai mwalyaakelyi.
Yi dahaa' sai mwaali'.
Yi nabaai sai yima'naabathelyi.”

Sahvara yagaala daza' ja'na kwadika mudivitaru mi'. ⁹Gaala kininnaka dazara yilaaya yadivisare. Gotiyare kinginamwaalyisavi mwaaida yi yuyagaa' yuyagaa' gaala mwaaideri yilaaya yadivisare. Yi sahvara sahvari byaanna diraginya' wiadivi' sahwarine yaya' munyaba makidivi' yi “Su! Su!” widipi'dere. Yi yuyagaa' gaala kininnaka dazara sara kyapiji ¹⁰yi a'mwe naanga (24) tiwedipoyara dazara Gotiyaryaba kinginamwaalyisavi mwaalikere sinnyiki kwaakewi walamwaaibi'dere. Yi sahwai yuyagaa' yuyagaa' gaala mwaaidarina sahvara lotuya yadivisare. Sahvara yawi'na “Nemire maremwaalya'nebwi gamiresira,” kumire kingimwaaih'i'nya goliya livaradivi' kinginamwaalyisavire gidikusaba wala'dengi. Sara yapiji yi daata dara dipi'dere:

¹¹ “Nemire Naangeigi, nemire Gotiyaigi!
A'mwe yuyara giminyina yilaaya gya'neigi
Gimi saigi yiniga wi'na nebulya'nanyaiginyi.
Yi byaanna diraginyabwi gizaaya'na nawi'nyasi.
Yi giminne yaya' munyaba makilya'naji
Yi gimi diraginyabwi limwaga'dinne'naji nawi'nyasi.
Sa' darevinyi. Gimi yuya wakyeiginyi.
Yune gimire simunyaburina kwakye yima'nyaakeigi.
Gimire simunyavidaa'nyi yuya daza warikengi. Mwaaihasangi.”

Joni bukuya piri' mena pigi'mwagakesavi tinna wanganake'nesi.

5 ¹Yi kinginamwaalyisavi mwaaidi'nyiyare aangasiri nimi bukuya pwi tinna wangamwa. Si pikarya kininnake' kusawiji mwasimagiji. Yi muritavayi'bwa'nika ata puridaa'nyi pwaralya kininnaki. Yi yaasiwa'nanyai marilaaya'na sara muritavayi'bwa'nikilyi. ²Nimi ejeliya diraginnaka pwari tinna wangamwa. Sai gannya maangwiraayavi jaka naangave'na dara diwa' “A'mwe tewaanyai bukuya diri yiniga wi'na tilaaya'nebwi kininnakei aihwalaka? Tewaanyai diraginnakei bukuya diri pwiynika diri yesivalalisa' ya'na aihwalaka?” ³Kiri' sasarei aane pwai kwai mi'. Sigunyavi mwaalikei aane pwai kwai mi'. Kwaakevaki mwaalikei aane pwai kwai mi'. Kwaakevi amwihi wilarikei aane

pwai kwai mi'. Yiniga wi'na tilaayoji bukuya siri kusawi ja'na tinna wanganannei aane pwai kwai mi'. Arikewi. ⁴Sarajiya a'mwe pwari mabiramaari. Bukuya si tilaayoji kusawi tinna wanganannei tewaanyari mabiramariwaasa'na yi nimi kinna kwalaalya diwa. ⁵Kinna dadaazi a'mwe naangerajiya pwai nyidiwa' "Gimi kinna kuna madinnera! Yithaa! Laayoniyai Juthare yita savaakiyai Ne Devitimire yita savaakidaasai, yisare pwipulyavi kwaraka yidevaabi' sara yima'nakei sai malya' wawilavakelyi. Sarevi yi sai bukuya si tilaaya'nei muritavayi'bwata ata puridaa'nyi saraala marapyasibwarakya'na yiniga wi'na yannelyi." ⁶Sara kanyidiwa' nimi Sipizipiya Diwinyari tinna wangamwa. Sahwai kinginamwaalyisavi gaala kininnaka daraai daraala dazaraayabaji a'mwe naanga dazaraayabaji tinnyaba daavina. Saba sai mena tamakesai ayina dikaa'nikabaai daa'di'nyi wangamwa. Gamire minyaginyavi a'ba saanya diraginnaka ata puridaa'nyi pwaraalya kininnakei. Nabaai tinna ata puridaa'nyi pwaraalyara kininnakei. Yi tinna dazara yi Gotiyare Kurya ata puridaa'nyi pwaraalyarera. Gotiyai kwaaka yuyawi yunewinna maryaasakere. Sipizipiya sasareru tinna wangamwa.

⁷Sipizipiya Diwinya dazai wawaka kinginamwaalyisavi mwaalikere aangsiri bukuya daza' ma'mwaawi'. ⁸Bukuya mi'na kama'mwaawi' sagaa' gaala kininnaka daraai daraala dazaraji a'mwe naanga tiwedipoya dazaraji Sipizipiya Diwinyaryaba gidikusaba kwaakewi wala'na. Sahwarajiya gazaizai piradazabisasi diziya goliya piri kininnakelyi. Yi diziya dazangi jitirinya yiravayihwia'ne' yunebanna wilarikengi. Wabatirinya daza' Gotiyare a'mwe tewaanyara Gotiyari widadivisangira. ⁹Yi sahwaru daata mudika piri' dara diwaa':

"Bukuya daza' gimi maarya'neigi
 Savire muritavayi'bwasa marapyasibwarakya'neigi
 Yi yiniga wi'na nebulya'nanyaiginyi.
 Sare' dare'nanyi. A'mwera giramesaiginyi.
 Sasaregire tawevi a'mweraavi mubahi.
 Sahwara Gotiyarina wijaaya'neraavi gimi.
 Yita gazavaasavaakiyaraaviji yagaala ge gejiyaraaviji
 A'mwe kilaaka dala nabinabinyajiyaraaviji
 Ajimya yuyangiya gasasaviyaraaviji mubamaaragi.

¹⁰Nemire Gotiyarina maremwaaidsaraavi wimwaaiahadi
 Widaaya'nera Gotiyarina yira'divisaraavi wimwaaiahagi.
 Sahwara Kwaaka yuyavakiyaraavi maremwaaibi'derera."

¹¹Nabaai nimi wangadi ejeliya kwalaalyaraavire maangwiraaya' kadika wi'niwa. Sahwara kinginamwaalyisaviji gaala kininnakeraayabaji a'mwe naangeraayabaji ghipaledaa'na. Sahwara kwalaalya kwalaalyara mwaaaha'. Yi miliyoni miliyoniyaraji taawizani taawizaniyaraji kwalaalya naanga naangera mwaaahasare. ¹²Sahwara jaka diraginna dara diwaa':

“Sipizipiya Diwinya dazari tamakesalyi.
 Sai nawi'nya maarya'nei yiniga wi'nanyalyi.
 Yi dazangi yilaaya maarannei yida'nanyalyi.
 Diragina maremwaalya'nebulyi gilyivikiravinakebulyi
 Sidu'nakebulyi diragina naangebulyi gamirengi.
 Gaminne yaya' munyaba makilya'naji
 Byaanna diragina' yilaaya' wijaaya'naji
 ‘Su! Su!’ wija'naji tewaanya'nelyi.
 Yi sahwai gavei yiniga nebulya'nanyalyi.”

13 Yi nimi Gotiyai yuya wakyaa' kwaraavi kadika wi'niwe'. Yi Sigunyavi
 mwaaihasaraaviji yi Kwaakevaki mwaaihasaraaviji yi kwaakevi amwihi
 wilakasaraaviji yi saalaalyavi wilamwaaihasaraaviji, yo, yuya sabanyaavi
 wilamwaaihata kwaraavi wi'niwe'. Sahwara dara diwaa':

“Kinginamwaalyita savi mwaalikelyi
 Sipizipiya Diwinya kwalyi
 Saraai nawi'nya yuyabwi maarika!
 Yi su suyaji yaya makilyabulyi
 Byaanna diraginyabulyi diraginnakebulyi
 Saraari nawi'nya dazabwi kuna warana!
 Yuyagaa' yuyagaa' kuna waribainana!”

14 Sara kadiwaa' gaala kininnaka daraai daraala dazara yi dara diwaa' “Yi
 sahirisi. Nebula naangesi.” Yi a'mwe naangera kwaakewi walaruta'neva
 yi lotuya yivaniga'. Yilaaya wivaniga'.

**Sipizipiya Diwinyai bukuyavire muritavayi'bwarake
 marapyasibwarakake'nesi.**

6 1 Sipizipiya Diwinyai bukuyavire muritavayi'bwaraka ata
 puridaa'nyi pwaraalyangi aaya mudi'nanya' marapyasibwarakina
 yadaa'nyi yi nimi tinna wangamwa. Sipizipiya Diwinyai
 marapyasibwarakina kyawa' gaala kininnaka daraai daraalyaraavidaa'nyi
 pwai yi sigunyavi yi'munya pidevaabi' gamire maangwiraaya' jaka
 naanga dina “Kaaja!” 2 Yi nimi tinna ayahi wanganna. Yithaanyi, oziya
 yaaka pwari tinna wangamwa. Yi a'mwei yilamwaaidi'nyi mwaryaginyisi
 limwamwakei. Sahwarina kingimwaaihi'nya piri' wijawaasa' malyavi
 wawilaya'ne'. Yi sai mala kwalaalya wawilaya'nei wawoka “Mala'na
 wawilavima!” daka wina yiwa'.

3 Diwinyai wila ata puridaa'nyi pwaraalya yawawidaasi bukuyavi
 pwiwinike' pyaasibwa'na kyawa' nimi kadika wi'nyina. Yi gaala kininnaka
 yawawidaasai dina “Kaaja!” 4 Yi oziya pwai yi'mavaabina. Sai wayaakei.
 A'mwei oziya dazari yilamwaaidi'nyiyarina diraginyabwi wijawaasai.
 Sahwai diragina sabwi maaraka tewaanyagaa' yi naryagaa' yiniga
 marasi'nya'nelyi. “A'mwe Kwaakevakiyara tamakinipika!” daka sara

yiwa'. Sarevi yi sarina kwaari'masiraminya naanga piri' wijawaasa' wawinya dazahiri' ya'ne'!

⁵Diwinyai wila yawwidaasa' bukuyavi pwiyinike' pyaasibwa'na kyiwa' yi nimi kadika wi'nyina. Gaala kininnaka yawwidaasai dina "Kaaja!" Yithaanyi, nimi oziya dikwaagila pwari tinna wanganna. Yi a'mwe yilamwaalakei gamire asiri sikeliya piri' tika nya'ne maraya'ne' limwamwa'. ⁶Yi gaala kininnaka daraai daraalyara mwaaihata saraavi tinnyaba maangwiraaya'bi' nimi kadika wi'nyina. Yi maangwiraaya daza' dara dina "Mijikegaakira. Maalitaaya witimaa'gula pwari nigwia yune paaivi kinaayavine'na (yirika gavevi wawinya ya'ne nigwia') gimi sikeliya dimarayi! Yi maa'gula maalika daraai dalyangi baaliya (witiyabi') nigwia yune paaivi kinaayavine'na sikeliya dimarayi! Aawapaaya wigainajahaa' kiri' welivananya yidike'nesi waainiyasi kayaaka migalakinna!"

⁷Yi Diwinyai wila bukuyavi pwiyinike' dawaai dawaalya' pyaasibwa'na kyiwa' yi nimi kadika wi'nyina. Yi gaala kininnaka daraai daraalyai aayai sare maangwiraaya' dina "Kaaja!" ⁸Sara kyiwa' nimi ayahi tinna wanganna. Yithaanyi, oziya nabalikilaa'naka pwari wanganna. Yi, sari yilamwaalikeri gaminne yaya' "Baryabulyiyala." Yi sahwari Bainikeraayabanya' mijamaridi'nyiyasi. A'mwe yuyavakaavi Gotiyai marajaapaina yaka dina "Diraginya dare' yihizaawa. Yuyawi a'mwe daraai dalyaraavi tamyivainyina yakiri a'mwe gave pwari diramakyi! Gazawizawi a'mwe daraai dalyaraavi tamyivainyina, gave pwari tamakina. Sana sana jidewaaihilyi. Yi sare'ne diraginya' kihizaava'muji yi pwaraavi kwaari'masiraminyasi tamakina, yi pwaraavi mijika naangesi tamakina, yi pwaraavi nalaaya nabinabinyaji tamakina, yi pwaraavi laayonyaraji sigyaaryaraji dawakina jidewaaihilyi."

⁹Yi Diwinyai atilya' wila bukuyavi pwiyinike' pyaasibwa'na kyiwa' yi nimi tinna wanganna. A'mwe bainika pwaraavire kuryara Gotiyare kwaraanyaba kwaakewi mwaaidapiyaraavi wanganna. Sinnawi a'mwe dazara Gotiyare yagaalya' diraginna limwagaresare. Yi sara yadivi' yagaala daza' jalikurakesare. Sare'na sahwaraavi Gotiyare yikamaangera tamakina yesare. ¹⁰Kurya dazara maangwiraaya jaka diraginna dara diwaa' "Kingiya Naangeigi yuyangineigi gimi nawi'nya mwaaihi. Girika maayaigi. Yi gimire sabwi yi nebulya'na yunewinnanyasi. Sareigi, mena gatha'daregaa' kyiwawoji gimi kotiya' a'mwe Kwaakevaki mwaaihasaraavi jitheigina'? Yi sahwaraavi nemire tawenna gathingaa' diriviki'deigina'?" ¹¹Sara dina kyiwaa' Gotiyai gazarinazarina baazi'ma'nya yaake' saaminya' wijaavina. Yi wijaavina yaka sahwaraavi widina "Sarimi maalikegaa' kave kwaamu' dimwaalyi! Divi yikamaangera sarimire avaiyaasiwa'wawinyaraavi, sirya'mweraavi tamakipi'dere. Yi yihiramaketabaabi' tamakipi'dehaa'nanyi. Yi nimi

yawi'na yage yunegaa'nera yiniga sara baibi'dehaa' yi nabaai sarimire taweji'na tivikirideinyi.”

¹² Diwinyai wila ata puridaa'nyi dalya' bukuyavi pwiyinike' pyasibwa'daa'nyi nimi tinna ayahi wanganna. Kwaakevaki wininya naange' kyima'niwa' tinna wanganna. Yi nyilyai tinga naange' yima'nyina. Sai yirika mavuri. Yi lawei yuya wayaaka tawe'bisa' yima'nyina. ¹³ Sigunyaviya silingaaminy sa kwaakebanna bwala'na. Yisila yita pihiyare mya milyadi'nyi yihuta naange' puraki'daa'nyi bwala'daawadevaabi' kwaakebanna bwala'na. ¹⁴ Sigunya kiris sa' mena wina. Yi lamulyi' pwalagi'mwadivi' wakadivitabaabi' sigunya' gi'mwanniwake' yimaanyina. Yi yuya mugunyaji ahu'mannyaji kumire wa'divisaba yagalya'ma'na, yi sangina ginyimwaaina yiwaa'. ¹⁵ Yi kingiya Kwaakevakiyaraji yi maremwaidivisaraji yi mala aawilasaraavi maremwala naangeraji yi a'mwe nigwihiravinakeraji yi a'mwe diraginaangeraji yi yaasiwa'wawinya widaayadivita gazarazaraji yi pwara kumire wawinya yadivita gazarazaraji yuya sahwar Kwaakevakiya situsangi lika yulyaramaripi'dere. Yi sila mugunya naangengi kusawi lika wilapi'dere. ¹⁶ Yi sahwar yuya mugunyaji silaangeji jaka dara diwaasare “We! Sarimi niminyi a'badaa'nyi jilanyilabwaraama! Gotiyare sinnyiki, kinginamwaalyisavi mwaalikeriji yi Diwinyare sinna tikeviji lika dimaraneyulakya! ¹⁷ Sare' dare'nanyi. Yirika naanga dazaraare dazagaa' yi similika wiladehaaki. Kayaa'nanya' tivikirya'ne' dahaa' sa' mena yima'niwa'. Sarevidaa'nyi yiniga aaihwei daavoji yi daza' wawilavadelaka! Aawa.”

**Yizireliya kwala naanga (144,000) sara
Gotiyare dahilakinike' maaresa'nesi.**

7 ¹ Sa' mena kyiwa' Kwaakeviya tivimaginya dawaai dawaalyaba ejeliya daraai daraalyara daa'dapi nimi tinna wanganna. Sahwar Kwaakevakiya yihuta dawaai dawaalya diraginna limwaga'na. “Dahaa' yihuta sa yihu'maanarya Kwaakevakiji saalaalyaviji yita gazarizariji nyadika!” deva diraginna limwaga'na. ² Yi ejeliya pwai nyilyai bilyiri'dimagi yidawadaa'nyiyari nimi tinna wanganna. Ejeliya sai Gotiya gaala mwaalikere yavikwajike' limwagaka yi sai maangwiraaya jaka diraginna naanga'na dina. Yi ejeliya daraai daraala dazaraavina Gotiyai diraginya' wijaavakera kwaakesi saalaalyasi kayaaka yigalakya'neraavi yi sahwaravi jaka dina. ³ Yi jaka dara diwa' “Sarimi dahaa' Kwaakevasi saalaalyasi yisaraji kayaaka yime'nya'bi' migalakupina! Nemi nemire Gotiyare yaasiwa'wawinyaraavire yamengi gamire yavikwajika pikarya yaadehaa'nanyi. Sara kyawaaji sarimi sahwaravi migalaki yapiji gave pwaraavi jihalakyideihilyi.” ⁴ Yi a'mwe yavikwajika pikarya' ma'mwaasaraavine ata dahilya' kanyidiwa' nimi kadika wi'niwe'.

A'mwe sahwaravaavi pikarya wakiwaka kwala naanga (144,000) sara. Yi Yizireliyaraavi yita gazavaasavaakiya pwara yavikwajika pikarya ma'mwaasara. ⁵Yi Juthare yisavaakiyara kwalaalyara (12,000) pikarya ma'mwaasara. Yi Ruvenimire yisavaakiyara 12,000. Yi Gaatimire yisavaakiyara 12,000. ⁶Yi Aazare yisavaakiyara 12,000. Yi Napitalaare yisavaakiyara 12,000. Yi Manaazare yisavaakiyara 12,000. ⁷Yi Simiyonimire yisavaakiyara 12,000. Yi Livaayare yisavaakiyara 12,000. Yi Yizakaamire yisavaakiyara 12,000. ⁸Yi Sevyulanimire yisavaakiyara 12,000. Yi Jozepiyare yisavaakiyara 12,000. Yi Bejaminimire yisavaakiyara 12,000. A'mwe dazara yi Gotiyare yavikwajika pikarya' ma'mwaasare.

A'mwe kwalaalya naangera baazi'ma'nya yaake baazi'ma'nikeraavinesi.

⁹Yuya daza mena kya', yithaanyi, a'mwe kwalaalya naanga naangera yi'bwa'nemwaaidapi nimi tinna wanganna. Yi kuminyi a'mwei ata yiniga wi'na gilanneraavina mi'. A'mwe dazara ajimya yuyangiya gazasaviyaraayawiji yita gazavaasavaasiyaraayawiji kilaaka nabinabinyajiyaraayawiji yagaala ge gejiyaraayawiji yi sahibadaasare. Sahwara kinginamwaalyisavire sinnyikiji Diwinya Sipizipiyare sinnyikiji daavina. Baazi'ma'nya yaaka saamigwazaaya wakevera yi kumire asiraavi maimunyarabi'ne limwageva ¹⁰maangwiraaya naange' jaka diraginna dara diwaa' "Nemire Gotiyai sai kinginamwaalyisavi mwaalikelyi yi Sipizipiya Diwinyalyi saraai mena nevadaihasama'mwaalyaraalyi. Naangebula!" ¹¹Yi ejeliya yuyara kinginamwaalyisaviji a'mwe naangeraayawiji gaala kininnaka daraai daraalyaraayawiji daaveva yunewinna bathakulaawesare. Yi sahwara kinginamwaalyisayaba gidikusaba kumire sinnyi' kwaakewi walaruta'nareva Gotiyari lotuya'na yilaaya yiwaa'. ¹²Sahwara dara dina:

"Sahirisi. Nebula naangesi.

Nemire Gotiyari yilaayabwi wiaana!

Byaanna diraginya' kuna warana!

Sidu'nakeburi aaya kaavilyala!

'Su! Su!' widaana!

Gaminne yaya' munyaba makilaana!

Diraginna maremwaalya'nebulyi diraginya naangebulyi

Yi sahwarebwi kuna kuna warana!

Yuyagaa' yuyagaa' dazabura waragwona!

Sahirisi. Nebula naangesi!"

¹³A'mwe naangerajiya pwai ja'nanyidiwa' "A'mwe baazi'ma'nya yaaka saamigwazaaya yira'neve dazara aihwaravaavaka? A'mwe saraavi jawi'mwaa gawidaa'nyara?" ¹⁴Sara kanyidiwa' "Nimire naangeigi, bewara dingaka! Nimi myawiriwa. Saigi yawi'manigi." Yi sai nyidiwa'

“A'mwe dazara yikamaangeraavi taanginya naangeji daangeji maare!
Yi taanginya naanga savidaasare. Yi kumire baazi'ma'nya Diwinyare
tawevi aalya yesa'nanyi. Sarevi baazi'ma'nya daza yaaka wannyina
ya! ¹⁵Sarevidaa'nyi sahvara Gotiyare kinginamwaalyisavi kusimagi
daa'divisare.

Nyilyaviji sawisaviji lotuya yadivisare.

Gamire anga nawi'nyavi sara yadivisare.

Kinginamwaalyisavi mwaaidei ye'mwannamwaloji

Yi sahvaraavi maredaa'da kimata bwakedaavadelyi.

¹⁶ Sahvara mijika ayahi yipi'dera mi'.

Nabaai aalya'na ayahi baibi'dera mi'.

Nyilyai mala tamya'ne'bi' diraginna widathera mi'.

Dika naanga gazasa' daanga wi'dathera mi'.

¹⁷ Dare' nanyi. Diwinya Sipizipiyai wimaremwaaladelyi.

Kinginamwaalyisayaba kumire maremwaalyai mwaaladei.

Sahvaraavi aaliyiminya nawi'nya yirijava wibwaridaakwadelyi.

Aalya gaala kininnake' nya'neraavi makwawodei.

Nabaai Gotiyai kumire tinnyaraavi yimwagathelyi.

Kidalaalya gazasa' yaalika kave yimwagathei.

Yi sahvara kinna ayahi dipi'dera mi'.”

**Bukuyavi pwiynika wila ata puridaa'nyi
pwaraalya' marapyasibwarake'nesi.**

8 ¹Sipizipiya Diwinyai wilya' bukuyavi pwiynike' ata puridaa'nyi
pwaraalya' mena marapyasibwa'mwa'. Yi Sigunyavi saba
yagaala maayawi kuna yada nyitaka pimaginya'bi' (aapi-aawaaya
sagaa') wavila'na yiwa'. ²Wavila'na kyawa' ejeliya ata puridaa'nyi
pwaraalyara Gotiyare sinnyiki daa'dapi nimi tinna wanganna. Yi
sahwaraavina pihuliya ata puridaa'nyi pwaraalya wijaavina yiwa'.
³Yi ejeliya pwai Gotiyare kwaraanyaba gidikusaba buladaa'na.
Yi sai maa'gula goliya' wabatirinya yiravayihwia'ne' limwagakei.
Sahwarina paawiraayana kwalaalya wabatirinya yiravayihwia'ne
wijaawakei sai a'mwe Gotiyare tewaanyaraavire wija Gotiyarineji
mari'bwarakya ya'nei. Yi sawhai kinginamwaalyisavi kusimaginya
di'binya goliya warika dazavi Gotiyarina wija Gotiyarina wijaaya'bisaji
wabatirinya' mari'bwarakya ya'nei. ⁴Yi paawiraaya dazangire jita
wabatirinyasi Gotiyare tewaanyaraavire gaminyi wija yagaalyaji
ejeliyare asiri limwagakevidaa'nyi yilaawaka munyaba Gotiyare
sinnyiki yi'ma'mwakengi. ⁵Sara yaka sai yikunaabithi'maa'gulya'
maaraka dike' yi dikwaraka kwaraanyaba maaraka yi maa'gulyavi
maradi'gwalaka yi sai dike' livaramwake' Kwaakevakina waimwaawi'.
Sai mena kalivaramwa' yi sagaa' yi'munya pilina, purinya yinnyina,

yinamiraasavire di'baake mwasabi' livapina, yi sagaa' Kwaakeva' wininya' yina yakengi.

Ejeliyara pihuliya makuresa'nesi.

⁶Ejeliya ata puridaa'nyi pwaraala dazara pihuliya ata puridaa'nyi pwaraala daza limwagarevera pihuliya pwa'nyi makusa'na yavada'galayoviravalimwanna yiwaa'. ⁷Yi ejeliya aaya mudi'nanyai gamire pihuliya' pwa'nyi maku'na kyiwa' sirimyasi dikesi tawe ye'mwannayima'naabina yaka Kwaakevakina walaraawina yiwa'. Kwaaka yuyangi dawaai dasimagi jaapaina yinikeba dawaalyaba tewaanya wa'di'nyi piba saba dike' nyina. Nabaai yita yuyaraavi dawaai dasimagi jaapaina yinikeba dawaalyaba tewaanya wa'di'nyi piba saba dike' nyina. Yi kurivaariya yuyangi yi sa kingingiji dike' baihinnyina yiwa'. ⁸Yi ejeliya ayawidaasai (2) gamire pihuliya' pwa'nyi maku'na kyiwa' mugunya naange' nadaasiya'bisa' dika naange' saalaalyavina walaraawina. Yi saalaalya dawaai dasimaginya jaapaina yinika davanyaai tewaanya wa'di'nyi pimagingyavaa' tawe' yima'nyina. ⁹Saalaalyavi gaala mwaaihasaraavi maraligisivaina yinika dawaai dasimaginya yima'nyina kyiwa' yi pimagingya pivaa' mena balina yiwaa'. Yi sipiyangina maraligisivainika dawaai dasimaginya yima'nyina kyiwa' yi sipiya pimagingya pivaa' kayaaka mena yinyina yiwa'. ¹⁰Yi ejeliya ayawidaasa pwai daraai dalyai (3) gamire pihuliya' pwa'nyi maku'na kyiwa' silingaaminyana naanga piri' di'baake' wana dika nebulya'bi' yidiwake' yi sa' sigunyavi yilamakwasaawaka yi bwala'na. Aalya yuyangiji aaliyiminnya yuyangiji sangi dawaai dasimaginya maraligisivainika davanyaai wa'di'nyi aalya pimagingya piningi silingaaminyana' bwala'na. ¹¹Silingaaminyana dazavine yaya' dara wo'nike' "Yirike'. Kayaakuryava." Aalya yuyangi pimagingya savaa' yirike' yima'nyina yiwa'. A'mwe kwalaalyara aalya daza' neva yi aalya' kumire munyiki dika kubaihinniwa' yi sahwarana mena baimwaa'. ¹²Yi ejeliya ayawidaasa pwai daraai daraalyai (4) gamire pihuliya' pwa'nyi kamaku'mwa' yi nabaai nyilyariji laweriji yuya silingaaminyangiji tamina yaka yi nyilyare dawaai dasimagidaasa pimagi yigalakina. Yi lawere dawaai dasimagidaasa pimagi yigalakina. Yi silingaaminyangiji dawaai dasimagidaasa pimagi yigalakina. Sarevidaa'nyi kumire baaka pade dahasaai nayaa wa'di'nyi baaka pade pimagingya' jihinya ya'na yina. Yi nyilyai yirikevi dahasaalyagaa' naangegaa' (2) nayaa purina yada yirikevi maalikegaa' (1) mavuri. Yi nabaai sawita pimagingya' sara mavuri yiwa'.

¹³Yi bwaangya naanga pwai sigunyavi tinnyaba pilavamaryadaa'nyi nimi tinna wanganna. Yi nimi kadika wi'nyina yadaazi sai maangwiraaya jaka diraginna dara dina "We! We! We! A'mwe Kwaakevaki mwaaihata

kemwaraavina dahasaai dahaa' kale nyiwa'. Ejeliya daraai dala pwara pihuliya pwa'nyi kamakurapi yi nabaai taanginya naange' sahwarraavi yi ma'nadesi."

9 ¹Yi ejeliya atilyai (5) gamire pihuliya' pwa'nyi kamaku'mwa' silingaamina pwa'nyi Sigunyavidaa'nyi Kwaakevakina mena bwala'mwakeri nimi tinna wanganna. Yi tinna kuna wanganna yadaazi sahwarina kiya' wijaavina. Kiya daza' yirorila yune kewewini yinigwalaawaka yi daanga maaya dazavine tikurya' baasa'nesi. ²Sai yirorilyavi tikurya daza' kabaasiwa' yi yirorilyavidaa'nyi jisa' yilina. Saaidika naangevire jita sa'bi' yilina yaka nyilyariji yihusavaakiji galabi'ji'na kyiwa' yi nyilyalyi yihusasi jihinya yima'nyina yiwa'. ³Jihinya yima'nyina yadaa'nyi jita savidaa'nyi baarinniyara yima'naabina yeva yi Kwaakevakina walaawina yiwaa'. Yi sahwarra diraginya' diraavalyare diraginya'bi' maarina. Yi Kwaakevakiya diraavalyara a'mweraavi kayaaka yigaidivitaabaibi' kayaa'na ya'ne diraginya' maarina yiwaa'. ⁴Maarina yeva yagaalya' dara maarina "Sarimi kurivaariyangiji Kwaakevaki dala pininna pininnanya yiri'nade sangiji yita gazarizariji kayaaka migalakipina! Aawa. A'mwe Gotiyare yavikwajika pikarya' kumire yamengi maayaraavi yi dazaraavi kayaaka nayaa jihalakyi! ⁵Sarimi a'mwe dazahwaraavi daanga naanga ji'mwagyidere. Kuna yiwopiji yune lawe atinanyangina. Kiri' sahwarraavi tamakya mipina!" Yi baarina dazara a'mweraavina daanga kayaa'nanya' wijaavadivisara. Yirivaburyara a'mweraavi tika da'divi' daanga wijaavadivitaabaibi' wijaavina. ⁶Yi daanga dazagaa' a'mwera balya ya'ne tusa'na bi'divi' kiri' sahwarra tinna mwanganyadivisare. Arikawi. Sahwarra "Balaana!" kuna yawi'divisare. Kiri' baryabwi sahwarraavi likaanya wodesi.

⁷Baarinna dazara oziyara mala ya'neraayawinnera yawimwavedaa'divitaabaibisare. Kumire minyaginyangi kingimwaa'hi'nya goliyabisa yilarikera. Yi kumire sinnyi' a'mwera sinnyi'bisi'. ⁸Yi kumire mijasa saaminaange, a'mwe kiningire mijasabisa. Yi kumire maangerika kavijilikere maangebisa, yi laayonyare saanyabisa. ⁹Kumire kihisangi baazi'ma'nya kaapaayabisa saabya' mareda'nikengi. Yi kumire piya kaariziya kwalaalyabi' oziyara mwagi'namakwodaapi mala'nera pa'da pa'da yinnadevaabi' worryaraavire piyangi pa'da pa'da yinikesi. ¹⁰Kumire suyarika yirivaburyaraavirebaabisarika. Yi suyariki kumire langeri' kwaamina daanga wijaaya'ne' kininnakeri' wari'. Nabaai kumire langerikaji daanga naanga daza' a'mweraavi kayaaka yigalya'nera. Sahwarra daanga naanga daza' wijaaya'ne diraginya' yune lawe atinanyangina maa'nikere. ¹¹Kuminyi munyaba kumire maremwaidei yi sai yirorila yune kewewini yinigwalaawika yi daanga maayaviya ejeliyalyi. Sarere yaya' Yiviruyagaalyavi Aavathoni, yi Girikiyagaalyavi Aapoliyoni. Yayavi aaya kaavilyasi, "Yuyangi Kayaaka Yigalakadei."

¹² Sinnawinya' taanginya naange' sa' menanyi. We' sinnawinya daza' menanyi. Yithaanyi, taanginya piriwaai dividaa'nyi yima'naabathewaai kuna wari'.

¹³ Yi ejeliya ata puridaa'nyi pwai (6) gamire pihuliya' pwa'nyi kamaku'mwa' Gotiyare sinniyiki di'binya goliyavi saanya dawaai dawaalyaba tinnyaba maangwiraaya piri' dina. Sa' dina yadaa'nyi nimi kadika wi'niwe'. ¹⁴ Yi maangwiraaya daza' ejeliya ata puridaa'nyi pwai pihuliya' limwagarikeri dara widina "Aalya naanga Yupiretiziyaviya ejeliya daraai daraala sara wila yi'nakasara saraavi dimakwaasa!" ¹⁵ Widina kyiwa' ejeliya sai ejeliya daraai daraala saraavi makwaasina kyiwa' Gotiyai a'mwe yuyaraavi yita davakaai dava'nevi jaapaina yada gave pivaa'na sahvara tamakya'neraavi dahilakinikera yovirawakigasare. Yi sarera aawaaya nyihaanya daza'na, yi yirika dazariki, yi lawe daziki, yi kwarama yune dazavina wawinya daza' ya'nera yovirawakinikere. ¹⁶ Yi ata gilyara aawilasara oziyaraavi mwaaihasara yi tu aadireti miliyoniyara. Kumire ata gilya'na nimi kadika wi'niwe'. ¹⁷ Yi nimi a'mabaaitinnya' ya'nena tinna dara wanganna. Oziyaraaviji oziyaraavi yilamwaaleveraaviji kumire sabwi darera. A'mwera kihisangi baazi'ma'nya kaapaaya baazi'ma'nevera, yi kumire kalaaya dazangire sa dikeviya wayaaka, yi gwaagwaaja yi saalipaayaviya awi'ja kininnakera. Oziyaraavire minyaginya yi kavijilikeibita laayonyaraavire minyaginyabisangi. Yi kumire maangengi dikesi jisasi sila saalipaayasi yima'naka mwasabi' livapina. ¹⁸ Kayaa'nanaanga dawaai data daza a'mwe pimagina savaa' tamakina. Yi yuyaraaviya davakaai mwaaidakilyiyaraavi maramaki yadivi' yuyaraavi davaa' mwaaidi'nyiyaraavi tamakina. Yi dika dazasi yi jisasi yi sila saalipaayasi sahvaraavi tamakina. Oziyaraavire maangengidaa'nyi livapina yaka tamakina. ¹⁹ Sare' dare'nesi. Oziya dazaraavire diragina' tamakya'ne diragina' maangikiji warina, likikiji warina. Sare' dare'nesi. Kumire suya kamaalyarabisangi. Yi kamaaiminyagina kininnakengi. Yi dazaji a'mweraavi kayaaka yigalakadivisare.

²⁰ A'mwe yuya pwara, kayaa'nanaanga daza tamakagihiwakera tinna nayaa wanganeva kiri' kumire asaji yavikaryadivita sangina kumire simunyabwi mudikebwi kuna myawiramariwaa'. Arikewi. Yimakeraavi lotuya ya sabwi, yi kwaasigotiyaraavi sahvara yavikaryadivita goliyaji silivaayaji biraaziyaji silyaraji yisaraji saraavi yilaaya'na bule'na wijaavadivitarata mi'. Yi kwaasigotiya dazara yi tinna yiniga mwanganyadivi' kadika yiniga mu'nyadivi' kaanya yiniga yamaryadivitarata mi'. ²¹ Yi a'mwe dazara kumire a'mwe pwaraavi tamakyabulyi giri'nya yabulyi ata limwangebulyi kukebulyi sasare sabwi kiburina simunya mudikebwi yawiramaa'divitarata mi'.

Ejeliyai bukuya maalike' Jonimina kujaava' tika nake'nesi.

10 ¹ Ejeliya pwai diraginaangei Sigunyabadaa'nyi waidavadaa'nyi nimi tinna wanganna. Sai gannya kilaakejiki yiraayasi bwaakinikei,

yi gamire minyaginyavi byaawilya' widaa'di'nyiyai, yi gamire sinnyi' nyilyaibi' yidadaa'nyi, yi gamire sivilyaraai dihibya'bi' ditaalita saaminyawa' yidadaasiya'bisaraai. ²Sarei gamire asiri bukuya maalitaaya pwi limwagakei, yi bukuyi tilaayinaka warina yadi'nyiyai. Sai saalaalyavi gamire sivila aangasi yilakadi'nyi yi kwaakevaki sivila kwanaami yilakina yaka daavina yiwa'. ³Daavina yada kavijilikeibisai laayonyiai pwaka dadevaabi' sai jaka naanga diraginna dina. Jaka sara dina kyiwa' sagaa' yi'munya ata puridaa'nyi daraala sa kumire maangwiraaya pilina. ⁴Sara pilina kyiwa' nimi yawi'na “Kumire yagaalya' yidavima!” yawi'na yena yiwe'. Nimi kadika wi'nyina yadaazi Sigunyavidaa'nyi maangwiraaya piri' dina “Yi'munya ata puridaa'nyi pwaraalyangire yagaala pimwake' sa' gimire simunyavi nayaa marabipalemwaaina ji! Pikarya mida'dinna!” ⁵Dina kyiwa' ejeliya dazai saalaalyaviji kwaakevakiji daa'di'nyi nimi tinna wangamwei “Yagaala naange' dima!” daka Sigunyavi gamire aangasi munyaba makina yaka ⁶dina “Gotiyarine yayavi yagaala nebulya' warya'ne' dima! Yi Gotiyai sai yuyagaa' yuyagaa' gaala mwaaidei, sai Sigunya' wakyaakesi yuya Sigunyavi warikeji, yi kwaakesi yuya kwaakevi warikeji, yi saalaalya kirisii yuya saalaalyavi warikeji yuya sa wakyaakei gamire yayavi yagaala nebulya' dima! Yirikeri' mena yaja sagaa'. Gotiyai yemwaala ayahi pizi'gwa yadei mi'. ⁷Aawa. Divi ejeliya ata puridaa'nyi pwaraalyai pihuliya' kamakuroji, yi gamire jake' kinnoji yi dazagaa' sagaa' Gotiyare yoimavajalikurakya sa' menanyi. Yi sa' Gotiyai wana nebulya'na yadesi. Yi gamire yaasiwa'wawinyara, gaminyi wi'nawijiwaakadivita saraavi nayaa sara widakabaabi' sara yima'naabakesi!”

⁸Yi maangwiraaya daza' sinnawi Sigunyavidaa'nyi kyima'niwa' nimi kadika wi'niwe' niminyi ayahi dara widina “Ejeliya saalaalyaviji kwaakevakiji daavakere asiri bukuya dazi tilaayinika si dimaraawa!” ⁹Sara widina kanyiwa' nimi ejeliyaryawinna kaanna wina yena, yi sari nimi widina “Bukuya maalika dazi dinyijaama!” widina kye, yi, sai niminyi widina “Di maara'gizi tika dinigu'na! Yi sa' gimire munyiki yirika gima'nadesi. Kiri' nabaai gimire maangiki kaamyoiwarakebi' waburya gyathesi.” ¹⁰Sai mena kanyidiwa' yi nimi ejeliyare asiri bukuya maalika dazi maarina yena yi nimi tika nyina. Yi nimire maangevi yi sa' kaamyoiwarakebi' waburya yina. Kiri' nimi mena kaniwa yi sa' nimire munyiki yirika nyiwa'. ¹¹Yi niminyi wija' dara dini! “Gimi Gotiyare yagaalya' (yikwia' niwaanya') yima'nadenna nayaa ayahi duziwaaki! Yi kilaaka dala nabinabinya kwalaalyara, ajimya yuyangiya kwalaalyara, yagaala ge gejiya kwalaalyara, kingiya kwalaalyaraji saraavina duziwaaki! Sara ja!”

A'mwe pwaraai yagaalya' jalikurakagilya'nesi.

11 ¹Niminyina yannyari' wijaavina. Yanna sari' yaamiji yunebanna ya'neri', yita kaanya yade mavamarya ya'neri'bisari'. Yi wijaavina

nyaka niminyi widina “Gimi wawa'gizi Gotiyare anga nawi'nyavi Gotiyarine kwaraanya kiriviji yunebanna yaamijiyita dakya! Nabaai sahwarina lotuya (yilaaya) yadivita a'mweraavina ata dihi! ²Kiri' anga nawi'nyavi kurita dazavi mwasilaa warikevi yaamijiyita mwakinna! Sa' yi gimi nayaa yagalya'ma'na ji! Waramaryana! Mwasimaginya daza' yi sa' ajimya yuyangiyara mu'nyadivisaraavire' yima'niwa'. Yi sahwarangana naanga nawi'nyaba (Jeruzaalemi) sivila paihipi'dere. Kuna yiwopiji lawe 42 (yirika 1260) yidaakupi'dehaa'nanyi. ³Yi nabaai nimi a'mwe pwaraala dazaraai niminyi jalikurakya'neraarina maryasaabideraalyi. Yi saraai bekiya kale'naji simunya mudikebwi yawiramaarya'naji sa' baazi'ma'nakilyi yi niminyi nyu'nakilyi pwaraavi wijiwaakikaderaalyi. Kuna yiwokilyi yune yirika 1260 sagaa'nanyi.” ⁴Saraai yita woliviyawaalyi. Yi laamivananya' yilakya'newaalyi. Yi sareraai kwaaka yuyavaakine Naangere sinnyiki daakilyaraalyi. Woliviwelivananya' laamivananyavi dika yewita'divi' baaka wannadevaaibi' saraai Gotiyare Kuryare diraginyavi jalikurakikaderaalyi. ⁵Nabaai a'mwe pwai kwai “Saraari kayaa'na yigalima!” dozi yajai, yi nabaai saraare maangevidaa'nyi dike' yima'noji sahwarare yikamaangeraavi dika nakadere. Yo, a'mwei “Saraari kayaa'na yigalima!” dozi yajai yi sasare dazaburi sai balina yadelyi. ⁶Saraai diraginya' kininnakeraalyi. Yuya sagaa' saraai Gotiyare yagaalya' wi'nyina yakilyi pwaraavi wijiwakadaakilyiyagaa'na yiraaya' galalimwagya'ne' yi burike' maya'ne diraginya' kininnakeraai. Yi saraai aalya yuya tawe yimawakya'neraai, yi a'mwe Kwaakevakiyaraavi kayaaka yigalakya'neraavi kayaaka dala pininnanyaji tamyane diraginyasiyaraalyi. Yuya sagaa' saraai “Sara yaka!” dakilyiya' yi saraai yiniga wi'na yina yikaderaalyi.

⁷Saraai kirimire jalikurakiwawinya' mena kyi'mwannakiri yi sigyaarya dazai yi yirorila daanga maayavi mwaaidei savi yagalya'mavoji yilaabathelyi. Yi sai saraalyi mala bwa'nipi'delyi. Yi sai saraari wawila'na yoji yi saraari tamakina yaderaalyi. ⁸Yi nabaai anga naanga dazabanya tutaanya naangevaki saraare kilaakejikaai waradezikaalyi. Anga naanga daza' Kuryai dadeva ke'ba'nanya'na “Sothomima, Yizipima,” wo'nikesi. Sabanyaai Gotiyare yikamaangera mwalyaasabanyaarina sara wo'nikesi. Da anga naanga dazahibanna saraare Naangei yita yovihirannikevi balake'. ⁹A'mwe yuya kilaaka dala nabinyaji'jiya pwaraji yi yita savakaaviyaraji yagaala yuyangine pwaraji ajimya yuyangiya pwaraji jalikurakya dazaraari tinna wangamanigasare. Yi yirika darikaai dari' yoji maalikegaasi yune sagaa'na wangamanigasare. Yi sahwarangana a'mwe pwara saraari maralikirakya'na “Ya. Gilekavi'ninnyavi wilakaana! Wagila nuwva'nadika!” yiniga dipi'dera mi'. ¹⁰Saraai mena baimwaalya'na a'mwe Kwaakevakiyara sahwarangana yilaaya yipi'dere. Yi nabaai sahwarangana kwarama yadivi', yi tika wapaa nadivi' sihumale kwiya'mweraavina

wijaavipi'dere. Sare' dare'nanyi. Gotiyari wi'nadi' a'mwe Kwaakevaki mwaaihasaraavina widiwaalya'na dazaraai taanga kayaa'nanya' wijaavagileraalyi.

¹¹Yirika darikaai darisi maalikegaasi mena kyiwa' yi nabaai Gotiyai pwa'nyi maku'nya gaala ya'ne' kamaryaasiwa' saraari kwimwa' yi saraai dikaa'na yagila, yi kirimire sivilyi daavina yiwaalyaraalyi. A'mwera saraari tinna wanganna yeve lika naanga yiwaai'. ¹²Yi saraai maangwiraaya piri' Sigunyavidaa'nya' kadika wi'nyina. Yi saraari jaka diraginna dara widina “Kirimu munya davanna jilaabila!” Yi saraai kadika wi'nyina yagila munyaba Sigunyavina yiraayavi yilaawina. Yi saraare yikamaangera sara tinna wanganna yadaapi saraai yilaawina yiwaai. ¹³Yi dazagaasagaa' wininya naange' yima'nyina kyiwa' yi anga naangebanya pimagingya pivaai' yi savaa' kayaaka yima'nyina. Yi anga pimagingya naangeba pimagingya ata puridaa'nyi daraai daraalyavaka kuna warina. Nabaai wininya dazavi a'mwe kwalaalyara (7,000) sara mena balina. Balina kyiwaa' a'mwe pwara yivainikera lika naanga yadivi' yi sahwara Gotiya Sigunyaviyarine yaya' munyabanna makina yiwaasaraavinera.

¹⁴Taanginya naanga daraalya' we' pwaraalya' sa' menanyi. Yithaanyi! Yune maalikegaa'na yoji yi taanginya daraai dalya' yi yarai yima'nadesi.

Ejeliya ata puridaa'nyi daraalyai pihuliya' pwa'nyi makurake'nesi.

¹⁵Yi ejeliya ata puridaa'nyi daraalyai gamire pihuliya' pwa'nyi maku'na kyiwaa', yi nabaai, Sigunyavidaa'nyi maangwiraaya pini jaka naanga'na diraginna dara dina “Nemire Naangei Gotiyai gannya Kiraazitiyai Kingiya dahilakyaakeri maryasaabakelyi maremwaalya Kwaakevakiya yuya gamire yima'niwakengi! Yuyagaa' yuyagaa' sai kingiyai maremwaaidelyi.” ¹⁶Sara dina kyiwaa' a'mwe naanga tiwedipoyara Gotiyare tinnyari kunnya kinginamwaalyisangi mwaaidapiyara kumire sinnyi' kwaakewinna walaruta'nareva Gotiyari yilaaya yina yeve ¹⁷dara dina

“Naangeigi, Gotiyaigi Diraginya Yuyangi Aaya Kaavilyaigi Gimi dahaa' mwaaihinyaigi kigaakuna kuna mwaalagineigi Gimire diraginya naange' maaragina kingiyaigi mwaaihinya'na Yi nemi giminyi 'Su! Su!' githivanigo.

¹⁸Ajimyaya yuyangiyara mu'nyadivisara giminyina similika wilakere. Kiri' gimire similika naange' mena yima'nivani'. Dahaa' kotiyavi yi'maya'negaa' bainikeraavina yima'nivani'. Dahaa' gimire yaasiwa'wawinyaraavina tivikita nawi'nya wijaaya'negaaki.

Sara yi Gotiyari wi'nawijiwaakadivisaraji, yi gimire tewaanyaraji, Sahwara lika yadivi' giminyi dalaangewi wila'nadivisara

Yi a'mwe kwaakewinyaraji yi a'mwe munyabanyaraji.

Nabaai dahaa' a'mwe Kwaakevaki mwaalyaraavi

yigalakadivisaraavina,

Yi sahwaravai kayaaka yigalakaya'negaa' mena yima'nivani!"

¹⁹A'mwe naangera mena deveгаа' yi Sigunyavi Gotiyare anga nawi'nya' baasina kyiwa' baasinika kusawi yi bukuta Gotiyare wilimwagarakevire' yi sa' ku'maayaba warina. Bukuta savi Gotiyare kiwinya ye'mwannajaake' wilarike' dara yawiryane'si. Gotiyai nemiji ye'mwannamwaalikelyi. Sa' ku'maayaba warina yadi'nyi yinamiraasavire di'baake mwasabi' livapina, purinya yinnyina, yi'munya pilina, kwaakeva' wininya' yina, sirimya naange' bwala'na yakengi.

A'mwesi kabaraawarya naangelyi sawaarinesi.

12 ¹Yi sigunyavi yibwaridaakwa naanga piri' yima'nyina. Sa' da'dare'. A'mwe piri' mwaalina. Yi sa' nyilyai gamire kilaakejiki baazi'ma'nikesi. Yi gamire sivilyiraari kwaaka dalaangewi lawei mwaalina. Yi gamire minyaginyavi silingaaminya atiraai sivilyiridaa'nyi pwaraalya kingimwaahi'nyangi. ²Sa' kaimiraavimunya kininnake' yi kaimiraaya maarya'ne daange' savi yima'nyina yiwa'. Yi daanga daza' yi wana kayaa'nanya'. Yi sara wiadaa'nyi yi sa' kaimiraaya maarya'negaa'ne jaka diraginna dina. ³Kuna jaka dina yadaa'nyi sigunyavi yibwaridaakwa piri' yima'nyina. Daza' yi dare'. Yithaanyi! Kabaraawaryaibita naanga pwai mwaalina. Sai wayaaka yaka yi minyaginya ata puridaa'nyi pwaraalya kininnakei yi minyagizaanya atiraalyajiyai. Yi gamire minyaginyangi kingimwaahi'nya ata puridaa'nyi pwaraalya warina. ⁴Yi gamire suyai sigunyaviyi silingaaminya pivaa' wana pada'galabwaki'na yasaabina yaka kwaakevakina maralivaramaabina. Yi silingaaminya pimaginyaala savaa'na sigunyavi kuna warina. Yi kabaraawarya dazai a'mwe maarya'ne dazavire sidaliki daavina, "Kaimiraayari maarima!" dada yadaa'nyi. Yi sahwai "A'mwe kaimiraayari mena kamaarojiya," daka "Sagaasagaa' kaimiraaya dazai tika maranide'na!" daka yemwaaina. ⁵Kuna yemwaaina yadaa'nyi yi a'mwe' gawaalivaangei kaimiraaya kwalyai maarina. Kaimiraaya dazai dividaa'nyi yita aayiniyari' limwagozi yi sasi ajimya yuyangiya yuyaraavi diraginna maremwaaladelyi. Yi a'mwe' kaimiraayai mena maarina kyiwa' yi Gotiyai kaimiraayari munyabanna yarai yipalamakilaawina yiwakelyi. Kabaraawaryai "Maranima!" daka yiwakelyi. Yipalamakilaawina yaka gannya kinginamwaalyisavina makilaawina kyiwa' kabaraawaryai maraniwakei mi'. ⁶Mamaranyi kyiwa' yi a'mwe daza' a'mwamaaya kunyimaginna likaanya wina. Dazimagi Gotiyai gaminnebanya' mena yovirawakinikeba. A'mwe savi yiniga wi'na 1,260 yirikerikaavi maremwaaidivi' wapaaji wijaaya'nesi.

⁷Sigunyavi mala naange' yima'naabina. Ejeliya naangei Maaikeliji gamire ejeliyaraji sara kabaraawaryalyi mala ye'mwannabwa'nyina. Yi kabaraawarya dazalyi gannya ejeliyaraji yi sahvara kumire malyangi ayahi tiviki'na yina. ⁸Yaamiji tiviki'na yina yeva kiri' sahvara malya' wawilaya'ne diraginya' maayare. Sarevidaa'nyi yi Sigunyavi sahvara ayahi yiniga wi'na mwaai'bi'dera mi'. Arikewi. ⁹Yi Gotiyare ejeliyara sahvara kabaraawarya naanga dazari kewininna maralivaranna yiwaa'. Yi kabaraawarya dazai yi wana sinnawi kigaa' kamaalyai kunanyalyi. Yi “Yuyaraavi Kotiya Maryadela,” wo'nikei, yi Saataani Yikamaangei (Siwaakei) wo'nikelyi. Sai Kwaakevakiya a'mwe mwaaihata yuyaraavi kwaasi yagaala widadelyi. Maaikeliji gamire ejeliyaraji Kwaakevakina kewininna maralivaranna. Yi gannya ejeliyara kwaraaviji maralivaramwaasara sara salyi ye'mwannigwalina yiwaa'.

¹⁰Yi Sigunyavi maangwiraaya piri' jaka diraginna kadiwa' nimi kadika wi'niwa. Yi dara dina

“Aawi! Dahaa' nemire Gotiyai yuna nevadaihasamaa'mwa'.

Yi ku'maayabanna gannya diraginya' mena yima'naabiwa'.

Yi dahaa' sawhai Kingiyai mena maremwaimwa'.

Gannya Kiraazitiyai Kingiya dahilakyaakerebwi yuna maa'mwa'.

Sare' dare'nesi. Dahaa' kewewininna mena livaramwaasa'nanyi.

Neya'mweraavi kotiya marya'ne dazari yuna livaramwaa'.

Nyilyaviji sawisaviji nemire Gotiyare tinnyari neyidaanganaka

Sahwai neminyi kotiya kayaa'na diraginna maryadelyi.

Kiri' sasareri dahaa' ejeliyara nayaa livaramwaasarinera.

Sara kyiwaa' sai mena kewininna waimwaawikerinera.

¹¹Neya'mwera Sipizipiya Diwinyare tawevina malya' wawila'mwaa'.

Sahvara gamire yagaalya' wijalikurakevevi malya' wawila'mwaa'.

Kwaakevaki nawi'nya mwaalya'na simunya kwalaalya myawiriwaa'.

Aawa. ‘Yikamaangera neramakipika!’ deva baihana'na yiwaasare.

Sasare dazaburi malya' wawilaveva yikamaangeri marasi'niwaasare.

¹²Sarevidaa'nyi, Sigunya'giji sahiba mwaaihasaihilyi yilaaya ji!

Kiri' Kwaakeva'giji saalaalya'giji kiriminyi mwaaihasaraavina we'!

Taanginya naange' sabanyaai mwaaihasaihi sariminyi

yihima'nade'nanyi.

Sariminyawinna Yuyaraavi Kotiya Maryadei mena waimwaabi'.

‘Yune maalikegaa'nanyainyi daakaji,’ sinna tike' kininnakei

Sariminyi kayaa'nanya dala pininna pininna ya'nelyi.”

¹³Kabaraawarya dazai tinna dara wangamwake' “O, Kwaakevaki kewininya dawinna nyimaralivaramwaasainyi midaaka!” Sara daka a'mwe' kaimiraaya kwalyari maaraka savi mijamakuna. ¹⁴Mijamakuna yadaa'nyi a'mwe dazavina bwaangya kware piya piriwaai wijaavina kyiwa' yi sa' a'mwamaaya kunyimaginna yiniga pilakwonnesi. Yi sa'

Kamaala naangeri like'na menyabanna mwaalya'ne' pilakwonesi. Yi nabaai sahiba kwarama dawaai da' yoji yi kwarama pimagingyasi kuna yiwawoji wapaaya pada'galamaremwaaladelyi. ¹⁵A'mwe' likaanya kuna wodaa'nyi yi Kamaala dazai gamire maangevidaa'nyi aalya' kwadaaka mudaasiya'. Aalya daza' yi aalyaaka naange' yada yi a'mwe' mijamakuna. Kamaalyai dara yawi'da "Aalyaake' a'mwe savi maramiloji saba yiwina yana!" sara yina yiwake'nanyi. ¹⁶Aalyaaka naange' a'mwe daza' mijamakuna yadaa'nyi Kwaakeva' a'mwevi gaimwanna. Kwaakeva' maanga taavina yada aalya daza' Kamaalyai gamire maangevidaa'nyi kwadaaka mudakade' nigu'nyina. A'mwe' mamihaasa'na nigu'nyina. ¹⁷Sara nigu'nyina kyiwu' a'mwe' yuna likaanya kyiwu' yi kabaraawarya dazai a'mwe dazavina similika wilina wiwa'. Yi sai "Sahirivire kaimiraaya pwaraji malya' mala yinaana!" daka kaanya wiwa'. Kaimiraaya dazara Gotiyare kiwinya mididivi' yi sahvara Jizaazarina jalikurakadivisara mwaaihasare. ¹⁸Yi kabaraawarya dazai saalaalyavi maangebaari daa'delyi.

Saalaalyavidaa'nyi Sigyaaryai yilaabina yake'nesi.

13 ¹Yi nimi tinna wanganna yadaazi sigyaarya pwai saalaalyavidaa'nyi yima'naabina. Sai minyagizaanya atiraalya kininnakei yaka nabaai minyagina ata puridaa'nyi pwaraalyajiyai. Yi gamire minyagizaanyangi kingimwaaihi'nya atiraalya warina. Yi gamire minyaginyangi yaya pini warina. Yi yaya dazangire aaya kaavilya' yi sa' dare'na "Gotiyarine yagaabiraizika dala pininna pininnanya." ²Sigyaarya dazai nimi tinna wangamwei yi sai lepaatiyaibisai yi gamire sivilya' beyare sivilya'bisasiya' yi gamire maange' kavijilikeibita laayonyare maange'bisa'. Yi kabaraawarya dazai sigyaaryarina gamire diraginya' wijaavina. Sari dahilakina yaka sari sarei kingiya mwaalina ya'na gami saibi'na, yi sara yaka sarina diraginya naange' wijaavina yiwa'. ³Sigyaaryare minyagina piri' yi mena davaka baimwanike'bisa'. Kiri' minyagina dazaviya wa'waaya' sa' yaalika yinnike' yaka ayina tewaanya yima'nyina yinikerinera. Yi a'mwe yuyara sigyaarya dazarina lika yiwainigulina yadivi' sari midinna. ⁴Sara midinna yadivi' kabaraawarya dazai gamire diraginya' sigyaarya dazahwarina wijaawake'na a'mwera kabaraawaryari yilaaya yina yadivisare. Yi a'mwera Gotiyai gaveri yilaaya yipinebaaibi' sahvara kabaraawarya dazari yilaaya yina. Yi sara yadivi' sigyaarya kwariji yilaaya yina yadivisare. Yi sahvara dara dadivisare "Pwai avainanyai sigyaarya dazaibi' aaihwakala! Sahwalyi mala yiniga ye'mwannarannadei aaihwakala! Sahwari wawilavadei daaka! Arikewi."

⁵Yi Gotiyai sigyaarya dazari wanganakina yadaa'nyi jaka naanga yaasiwa' dina yada yamarivani'. Yi sara yada Gotiyari yagaabiraizika

yivani!. Yi sai diraginya kininnakei maremwaala sasare sabwi ya'ne yiniga wi'na lawe a'mwe pwaraare atiziviliraai yaka piriwaalyangi (42). Sai dare'bi' dina “Yuyaraaviji yuyaburaaviji wavila'dinyainyi nimi.” ⁶Sahwai gamire maange' taa'da yi Gotiyarina yagaabiraizika yivanikelyi. Sai Gotiyarine yaya' yagaabiraizika dadelyi, yi Gotiyare angevinaji, yi Gotiyare yita dazavaa' Sigunyavi mwaaihata saraaviji. ⁷Yi Gotiyai dazari wanganakina yadaa'nyi yi sai Gotiyare a'mwe tewaanyaraji malya' ye'mwannabwa'mani!. Yi sara yada malya' wavila'da yi saraavi walamarakadere. Yi sai diraginya yiniga wi'nanya' maaraka sai kingiyai yita gazavaasavaakiyaraavinaji yi kilaaka nabinabinyajiyaraavinaji yi yagaala ge gejiyaraavinaji yi ajimya yuyangiya gasasaviyaraavinaji kingiyai mwaalina. ⁸Yi a'mwe Kwaakevaki mwaaihata yuyara sigyaarya dazari lotuya yipi'dere. Yi gazaizai gamire yaya' bukuya gaala mwaalya'niri mida'nikei dazari lotuya yadelyi. Bukuya dazi yi bukuya Diwinya Sipizipiyari sinnawi Gotiyai Kwaakeva' mwakyaakegaa' tamakinika sahwarilyi.

⁹A'mwei kadi'nakeinyi daakaji sai yagaala dathavi kadika nayaa pada'galawi'nana!

¹⁰A'mwe kwai kalavuzavina wiya'nei

Kalavuzavina nayaa wina yana!

A'mwe kwai kwaari'masiraminyavi balya'nei

Kwaari'masiraminyavi nayaa balina yadelyi.

Nabaai sasare dazabwi yima'naja' yi Gotiyare a'mwe tewaanyara sahvara diraginna daavapiji Gotiyari gamire diraginyasi kuna diraginna limwagapika!

Kwaakevakidaa'nyi sigyaarya pwai yima'naabina yake'nesi.

¹¹Yi sigyaarya pwai kwaakevi kusawi dikaavaka munyaba yidavadaa'nyi yi sari nimi tinna wanganna. Sai minyagizaanya piriwaai kininnakei minyagizaanya sipizipidiwinyare'bisawaalyiyai. Yi kabaraawaryai yagaala dadevaabi' dadei. ¹²Ayahidaasa sigyaarya dazai yi sai diraginya yuya' maremwaala sigyaarya aaya mudikere' maaraka yi sai aaya mudikere sinnyiki diraginya dazasi wawinya yadei. Sai wawinya diraginna yade'na sigyaarya aaya mudi'nanya dazarina Kwaakevakiji sahiba mwaaihata saraavi sara lotuya yadivisa'nanyi. Sinnawi kigaa' wa'waaya kayaa'nanya' sahwaru yinahu tamakya'ne' sa' mena yaalika yilakeri. Yi sahwarina diraginna yada Kwaakevakiyara yilaaya yina yadivisalyi. ¹³Sigyaarya ayahidaasai yibwaridaakwia'ne, atika maru'narya'ne dala pininna pininnanya naange yadelyi. Atika maru'narya'ne piri' yi sa' yi dare'. A'mweraavire tinnyari dike' yira'daa'nyiya' sigunyavi yagalya'ma'da kwaakevakina walaabina. ¹⁴Sai sigyaarya aaya mudikere tinnyari atika maru'narya'ne dala

nabinabinya yivanikelyi. Yi sasare dazabwi sai a'mwe Kwaakevakiyaraavi kwaasi yijiwaaidevulyi. Sai Kwaakevakiya a'mweraavi dara widada “Sigyaaryari' a'mwa'mwe' sarine yaya' munyaba makilya'ne' nayaa jila! Yi sigyaarya dazai sinnawi kigaa' kwaari'masiraminya' dawakakei sari, kiri' sai gaala ayina mwaali'. Yi sareri lotuya kuna nayaa jila!”¹⁵ Yi Gotiyai sari wanganakina yadaa'nyi yi sai sigyaarya pware a'mwa'mwewina simudinya' wijaavani'. Yi a'mwa'mwe daza' yagaala ja'na wijaavina. Yi nabaai a'mwe pwara sigyaarya sare a'mwa'mwe dazavina lotuya mi kyapiji yi a'mwa'mwe sa' saraavina dina “Sareraavi yarai diramakyila!” yi sara ya'na simudinya' wijaavina. ¹⁶Yi sigyaarya ayahidaasai “Sara jila!” kadiwa' yi pwara a'mwe yuyaraavi “Aangasiri midaakaji. Yamevi midaakaji.” deva “Sigyaaryarera daaka!” ja'ne baave piri' pikarya yavikaridivisa'. Yi a'mwe maalikeraaviji a'mwe yaya' kininnakeraaviji kwaraavi, yi a'mwe nigwinakeraaviji a'mwe gilyivi'maayaraaviji kwaraavi, yi a'mwe kumirena yadivisaraaviji a'mwe yaasiwa'wawinyaraaviji kwaraavi, yi yuya sareraavi baave piri' pikarya yavikaridivisasi. ¹⁷Sarevi yi nabaai “Kimaakiya dakyila!” kadiwaa' a'mwei baave daza' kunei sigyaarya dazarine yaya' piri', gaminne yayavine ata gilya kiri' yi sai gilyivisa a'mweraavi mubathe mi'. Yi sahvara gaminyi mubipi'dei mi'.

¹⁸Yi nemi daza'na simunya nayaa yawiraa! A'mwe sidu'nakei sai sigyaaryare nabaayavi ata nayaa dihila! Daza' yi a'mwe kwarine ata gilyasi. Yi a'mwe dazarine ata gilya' yi sa' 666.

Sipizipiya Diwinyare daata mudike' desa'nesi.

14 ¹Nimi tinna ayina wanganna. Yithaanyi! Mugunya Saayoni Sipizipiya Diwinyai daa'di'nyi yi a'mwe kwalaalya (144,000) sara sahwalai ye'mwannadaa'dapi tinna wanganna. Sahwara kumire yamengi Diwinyarine yayasi yi gannya Ganimaangerine yayasi yida'nikera mwaaiha'. ²Yi purinya nawi'nya Sigunyavidaa'nyi kyinnigaviwa' nimi kadika wi'niwa. Purinya sa' aalya naange aalijaka yinnadevaai'bi', yi y'i'munya pida jaka naanga yinnadevaai'bisai'. Nimi purinya daza' kadika wi'niwe' yi sa' piradaza'bisavi. Yi sa' aringa a'mwera gitaaya tadaapi piradazyagaala yinnadevaai'bisai'. ³Sahwara Gotiyare kinginamwaalyisavi kusimagiji yi daraai daraala gaala kininnakeraavi tinnyariji a'mwe naangeraavi tinnyariji saba daata mudika piri' dina yivaniga'. A'mwe Kwaakevakiyaraavi a'mwe (144,000) kwalaalya dazara ayina mubinikera yune sahvara daata daza' yawiramaapinere. Aane pwai kwai aawa. ⁴A'mwe dazara sahvara a'mwe saji girikita'nanya sabwi yevera mi'. Sare' dare'nanyi. Sahwara sidiraaya nawi'nya mwaaidivitabaai'bisara Gotiyari yagalya'mavetara mi'. Kwaakevakiya kayaa'nanya saburaavi limwagetara mi'. A'mwe dazara sahvara Diwinyai

“Saburi kaanya wima!” dada yadevanyari midinna yadivisare. A'mwe dazara sahvara a'mwe pwaraayawidaa'nyi Gotiyai ayina mubakere. Gotiyai gannyaraavi maarakera, Diwinyai kwarijina. Yi tika munne aaya mudi'nanya Gotiyarina wijayaatabaabi' sahvara Gotiyalyi Diwinya Sipizipiyalyi saraarera aaya mudi'nanyara mwaaiaha'. ⁵Sahwara kumire maangevi kwaasi yagaala kunera. Kwaasi yagaala majadivisara. Sahwara yiwetawakya maayara.

Ejeliya daraai dalyara desa'nesi.

⁶Yi ejeliya pwai sigunyavi tinnyaba kavilakuwa' nimi tinna wanganna. Sai yagaala tewaanya' yuyagaa' yuyagaa'ne' kininnakei. Yi sai yagaala daza' a'mwera kwaakevaki mwaihasaraavi wijiwaakya'nei. Sai ajimya yuyangiya gazasaviyaraaviji yita gazavaasavaakiyaraaviji yagaala ge gejiyaraaviji kilaaka nabinabinyajiyaraaviji wijiwaakya'nelyi. ⁷Sai maangwiraaya jaka diraginna dara dina “Yirikegaa' mena yima'niwa'. Gotiyai a'mwe yuyaraavi kotiyavi maryawibwarya'ne'na sarina lika nayaa yadivi' gaminne yaya' munyaba dimakilyi! Byaanna kininnakeri yilaaya ji! Sigunya' sasi kwaakesi saalaalyasi aaliyiminya yuya kiniji yavikaryaakei Gotiyari lotuya nayaa ji!”

⁸Ejeliya aaya mudi'nanyai mena pilakuna wina kyiwa' munyaba ejeliya pwai midinaabina yaka dina “Anga naanga Babiloni sa' kayaaka yada mena bwala'mwa'. Mena bwala'mwa'. Anga naanga Babiloni dazahiba yadevwi a'mwe ajimya yuyangiyara gamire girikita'nanya diraginyabwi midinya'na yi dare'bisasi. Sa' waainiya diraginya' wijavadaasi sahvara nyina. Kiri' sare'na Gotiyai yuyaraavina sinna tike' widaya'ne' yima'niwakesi.”

⁹Yi dividaa'nyi ejeliya pwai saraari midinaabina yaka jaka diraginna dara dina “Nabaai a'mwe kwai sigyaarya aaya mudi'nanya dazarina yi gamire a'mwa'mwerinaji lotuya jajai yi 'Baave' yamevi maaride' dingaka? Asavi maaride' dingaka?’ dada maaroji ¹⁰yi jajai gami sahwai waainiya piri' nadelyi. Waainiya daza' yi Gotiyare sinna tika widaya'na. Gotiyai aayagaa' aalyasi waainiya sasi ye'mwagakya yaka mi'. Aawa. Nabaai sai waainiya sa' gamire sinna tike' yi kaapiya kayaa'nanya' tivikiryanevi dimavadelyi. Sara dimavawijaavina kyoji a'mwe dazai sigyaaryare baavanakei yune nadelyi. Yi a'mwe dazai daanga kayaa'nanya' maaradelyi. Yi ejeliya nawi'nyaraavire tinnyariji yi Sipizipiya Diwinyare tinnyariji dika awitalange'na warikevi sila saalipaaya nadevi kayaa'nanya daza' maaradelyi. ¹¹Yi jisa' yida dika dazavi yi sareraavina daange' wijaavina. Yi jita daza' nabaai yuyagaa' yuyagaa' yimwaainagothe'. Yi a'mwe dazara sigyaaryari gamire a'mwa'mweriji lotuya yadivisaraji baave' gaminne yayavine' maarajai gazaizalyi sara nyilyaviji sawisaviji kave kwaamusabwi maapi'dera mi'.”

¹²Sasare dazabwi yima'najavi yi Gotiyare a'mwe tewaanyara diraginna daapika! Yi a'mwera Gotiyare kiwinya midinna, yi Jizaazari diraginna limwagapijara diraginna daapika!

¹³Yi nimi kadika wi'nyina yadaazi Sigunyavidaa'nyi maangwiraaya piri' dara dina “Pikarya dara jitha! ‘Dahaa'daasi a'mwera Naangeri diraginna wilamwaaidivi' jalikurakadivi' yi balapiji a'mwe bainika dazara yi sahwara yilaaya yadivi' tewaanaanga winadere.’” Kurya Tewaanyai kwalyi divani' “Yo, yi sahwara yadivita yagiyagi wawinya daza, daanga maa'divita daza yagalya'mavapiji yi kave mwaabi'dere. Sare' dare'nanyi. Sahwara yaasiwa' wiya yadivi' mi'. Aawa. Sahwara tewaanya yadivita sabwi, yi daza' sahwaraji ye'mwannigwiya yade!. Yi kumire diraginyabwi ku'maayabanna yima'naabathesi.”

Yirika Kwaakevaki tika munne maaryagaa'nesi.

¹⁴Nabaai nimi tinna ayina wanganna. Yithaanyi! Yiraaya yaaka piri' wa'disi yi pwai yiraayavi A'mweraavine Kaimiraayaibisai yilamwaali'. Sai gamire minyaginyavi kingimwaaihi'nya goliya' kininnakei. Yi sai gamire asiri kwaari'masi' wana lika gurimaanga di'bwarakiniki' limwagakei.

¹⁵Yi Gotiyare Anga nawi'nyavidaa'nyi ejeliya pwai walyaabina yaka yiraayavi mwaalika dazari jaka naanga dara dina “Gimire kwaari'masisi witiya tika munne dithaka! Yuya tika munne Kwaakevakiya mya mena yilake'na dithaka! Yi dahaa' yirika tika munne daza maarya'negaaki.”

¹⁶Sara kudiwa' a'mwe dazai yiraayavi mwaalikei sai gannya kwaari'masi' limwagarakisi tika munne Kwaakevakiya mya yilake davina yaka maryi'bwarakina yiwakelyi.

¹⁷Yi ejeliya pwai Anga nawi'nya Sigunyavi mannikevidaa'nyi walyaabina. Nabaai sai kwalyi kwaari'mata di'bwarakiniki' limwagakerinera. ¹⁸Yi nabaai ejeliya pwai kwaraanyaba yagalya'mavaka kaanna bina. Yi ejeliya dazai dikevi maremwaalya'ne diraginya' kininnakei. Yi sai ejeliya kwaari'mata lika gurimaanga di'bwarakiniki' limwamwakeri jaka diraginna widina mu'nyadivisaraavina “Ginnya kwaari'mata dazi' lika di'bwarakiniki' maara'gizi yuya tika munne Kwaakevakiya giraiپیwilyabaariya ditha! Yi mari'bwarakina yija warina ya! Gamire tika munne yuya, giraiپیya yuya mya mena yilake'na sara dithavamari'bwarakya!” ¹⁹Sara widina kyiwa' ejeliya dazai gamire kwaari'masi' limwagaka yi Kwaakevakiya yuya tika munne wila giraiپیyaviya yime'nya'bi' kihimavamaa'na yaka yi mari'bwarakina. Yi sai kihimavamaa'na, sila naanga giraiپیya tima'mwanga ya'nevi kusawi tika munne daza mari'bwarakina. Sila naanga daza' yi Gotiyare sinna tika widayasi. ²⁰Yi anga naangeba mwasilaa warika sila dazavi pwai giraiپیya yuya tima'mwanna. Sara yadaa'nyi sila savi mwasilaa tawe' walyaabina. Tawe walyaabina yada kaanya kuna kuna wawoka yune

1,600 sitaathiyamiya (300 kilomitaayavina) yaka munyaba oziyaraavire maangeyabanna (a'mwe tutaayai yunebanna) yiniga wi'na yilaabina yiwakesi.

Ejeliya ata puridaa'nyi daraalyara kayaa'nanya aaya limwagesa'nesi.

15 ¹Yi nimi Sigunyavi yibwaridaakwia piri' warikevi tinna wanganna. Yibwaridaakwia sa' naange', yi atika maru'nakulya'ne'. Yi dara wanganna. Ejeliya ata puridaa'nyi daraalyara kayaa'nanya a'mweraavi kayaaka yigalya'ne limwamwaasa'. Nabaai kayaa'nanya daza mena kiyawoji kwaakevi ayahi piri' yima'naabathe' mi'. Kayaa'nanya ata puridaa'nyi pwaraala dazangi Gotiyare sinna tika widaya' sa' mena yiwina yadesi.

²Yi nimi naange' saalaalya'bisa' tinna wanganna. Sa' sinimwavananya'bisa' dikesi ye'mwagakinikabaaibisa'. A'mwera malya' wawila'na yadivi' sigyaarya dazari marulawakina yiwaa'. Yi sahwariji yi gamire a'mwa'mweriji yi ata gilya gaminne yaya' dahilakaveviji marulawakina. Yi sahwara saburina "Aala!" yiwaasara. Sahwara saalaalya aaziyabita dazavi daavina. Sahwaraavna Gotiyai piradazabisa mena wijaavake limwanna. ³Sahwara Mozizai Gotiyare yaasiwa'wawinyare daasa', Sipizipiya Diwinyarine daasa' dina. Daata daza' yi dare'na

"Naangeigi Gotiya Diraginya Yuya Kininnakeigi!

Yuya yadinya naangeigi! Atika maru'nakuidaanyangi!

Kingiyaigi a'mwe ajimya yuyangiyaraavi maremwaaidinyaigi!

Gimire saburaavi yida'maraangengi! Nebulya'na yunewinnanyangi!

⁴Naangeigi nawi'nya giri'maayaigi gave yune pwainanyaiginyine'na Giminyina yi lika mi yadei aaihwilaka!

Giminyine yaya' munyaba mamakilyi yadei aaihwilaka!

Gimire yida'nanya nawi'nyabwi ku'maayaba mena yima'niwake'na

Ajimya yuyangiyara giminyawinna lotuya bahipi'deiginyi."

⁵Dividaasi nimi tinna ayina wanganna yadaazi yi Sigunyavi

Anga nawi'nya' lotuanga seli ange' jalikurakya'ne' sa' baasinyina.

⁶Yi baasinyina yikevidaa'nyi ejeliya ata puridaa'nyi daraala dazara

a'mweraavi kayaaka yigalya'ne kininnakera walyaabina. Sahwara

baazi'ma'nya nawi'nyaange wana giri'maaya yaka livamwaja yadaasiya

yira'nevera. Yi sahwara munnaanya goliya pwiyyinevera, kumire kihisavi

yunebanna pwiyyinevera. ⁷Yi gaala kininnaka daraai daraalyaraavidaasai

pwai ejeliya ata puridaa'nyi daraalyaraavina diziya goliya ata puridaa'nyi

daraalya wijaavina. Yi Gotiyai yuyagaa' yuyagaa' gaala mwaaidere sinna

tika widaya' yi sa' diziya ata puridaa'nyi daraala dazangi yunebanna

maanga yeku'nari'. ⁸Sagaa' Gotiyare byaannyasi diraginyasi sawaaridaasi

jisa' anga nawi'nya dazavi yunebanna wilari'. Yi anga dazavi kusawi

yiniga wi'na wiladei aane pwai kwai mi'. Aawa. Pwara nayaa yemwaaibi'dere. Ejeliya ata puridaa'nyi daraalyara kayaa'nanaanga ata puridaa'nyi daraalya sangi kumire wawinya' mena kyi'mwannapi sahvara Anga nawi'nya dazavi wibi'dehaa'nanyi.

Gotiyare sinna tika widayavire diziya ata puridaa'nyi daraalyanginesi.

16 ¹Yi anga nawi'nyavi kusawi maangwiraaya naanga piri' kyima'niwa' nimi kadika wi'niwa. Sa' ejeliya ata puridaa'nyi daraala dazaraavi jaka diraginna dara dina “Sarimi kaanya wawopiji diziya ata puridaa'nyi daraala daza Gotiyare sinna tika widaya' kininnake dithimayila! Nabaai Kwaakevakina walaawade'na!”

²Yi ejeliya aaya mudi'nanyai gamire diziya' kwaakevina dimavaawina. Yi wa'waaya (sokwawaanya) diraginya wana kayaa'nanya, daanga pinya'ne a'mweraavi yima'nadere. Yi a'mwera sigyaaryare baave' kininnakera, yi sahware a'mwa'mweri lotuya yadivisara sareraavi yima'nadere.

³Yi ejeliya ayawidaasai (2) saalaalyavi gamire diziya' dima'na. Yi saalaalya' a'mwe bainikerabita tawe' yima'nyina. Yi yuya saalaalyavi gaala mwaaihasa, sa mena balina.

⁴Yi ejeliya daraai dalyai (3) aalyangiji aaliyiminyangiji gamire diziya' dima'na. Yi yuya daza tawe' yima'nyina. ⁵Yi nimi kadika wi'nyina yadaazi ejeliya aalyangi maremwaidei dina

“Gimire kotiyavi kayaa'nanya dazaburaavi maryawibwa'dinya'na Nawi'nya nebulyaigi! Yi yida'maraangeigi mwaaihinyaiginyinera. Dahaa' mwaaihinyaigi, sinnawi kigaakuna mwalyeigi!”

⁶Kayaa'nanyara gimire tewaanyaraaviji wi'nawijiwaakyaaraaviji tamakesare.

Yi tamakadivi' kumire taweji' dimavesare.

Sarevi sahvara nipi'de'na aalitawe' wijawaanyare.

Kunnya kayaa'nanya tivikisa' ma'mwaasa' tewaanyasi.”

⁷Sara dina kyiwa' yi nimi kadika wi'nyina yadaazi kwaraanyaba gami sa' jaka dara diwa'

“Yo, Naangeigi Gotiyaigi Diraginya Yuya Kininnakeigi Sareraavi maryawibwa'mwaanyanna nebulyabwi yunewinna yida'maraangesi.”

⁸Yi ejeliya daraai daraalyai (4) gamire diziya' nyilyari dima'na kyiwa' yi Gotiyai nyilyari wanganakina yadaa'nyi sai a'mweraavi di'daanya wi'niwa'. ⁹Nyilyare dika naanga daza' yi sa' di'daananga kuna yada yi a'mwe dazaraavi di'daananga wi'nyina. Yi sahvara Gotiyarine yayavi biraiyagaala dina. Yi Gotiyai kayaa'nanaanga dazangi yidika'devurine diraginya kininnakei. Kiri' sahvara biraiyagaala dina, simunya mudikebwi myawiramaaryadivi' yi gaminne yaya' byaannake' makidivitara mi'.

¹⁰Yi ejeliya atilyai (5) gamire diziya' sigyaaryare kinginamwaalyisavi dima'na. Sara dima'na kyiwa' jihinya' sigyaaryai maremwaaideraavi jinnyina. Sahwara daanga kayaa'nanya' kuna maarina yiwaasavidaa'nyi kunnya taalisa tika da'nivaniga'. ¹¹Sahwara kunnya daangennaji wa'waayannaji yawi'divi' yi Gotiya Sigunyaviyari yagaabiraizika yina. Kiri' sahwara simunya mudikebwi myawiramaaryadivi' yi kumi yadivita saburaavina bule'na mujaayi yiwaa'.

¹²Yi ejeliya ata puridaasi pwainanyai (6) gamire diziya' Aalya naanga Yupiretiziyavi dima'na kyiwa' yi aalya sa' yaalika yunewinna yilina yaka tusa' nyilyai bilyiri'dimagidaa'nya kingiyara kaanya bya'nevi yawibwarakina. ¹³Yi nimi tinna wanganna yadaazi nyaabulyabisa daraai dala yimakera bina. Yi kabaraawaryare maangevidaa'nyi yi sigyaarya sare maangevidaa'nyi yi wi'nawijiwaakade kwaasiya sare maangevidaa'nyi daraai dalyara walyaabina. ¹⁴Sare' dare'nanyi. Kulaka kayaa'nanya dazahiniza yimakeraavire kulakengi. Nabaai yijiwaala dala nabinabinya, atika maru'narya'ne yadivisare. Sahwara Kwaaka yuyavaki mwaaihasaraavi maremwaaidivita kingiyaraayawinna kaanya wina yiwaa'. Sahwaraavi "Mari'bwarakaana!" deva mala bwa'nya'nevi Gotiya Diraginya Yuya Kininnakere yirika naanga dazagaa'nevi makabina.

¹⁵"Yithaanyi! Nimi a'mwe kukei bi'ma'devaabi' sariminyawinna bi'mavideinyi. Sarevi yi nabaai a'mwei se mwaryoji, yi gamire baazi'ma'nya kannyila gaminyaba nayaa maremwaaidei mwaalojiyai yi sai yilaaya yada tewaanaanga winikela! Yi sawhai yune kilaakeji'nanyai yamaryade'na mi'. Yi a'mwera gamire wagilya' wangabi'de'na mi'."

¹⁶Yi yimaka sahwara simagi Yiviruyagaalyavi "Aamaahethoni," wo'nikebanna kingiya dazaraavi marirakurakina yiwaa'.

¹⁷Yi ejeliya ata puridaasi pwaraalyai (7) gamire diziya' sigunyaviya yihusavi dima'na. Yi Sigunyavi Gotiyare Anga nawi'nyavi gamire kinginamwaalyisavidaa'nyi maangwiraaya naanga piri' jaka diraginna dada yi jaka daza' mwasabanna yinigwalyaabina. Sa' dara dina "Mena yima'niwaabi!" ¹⁸Dina kyiwa' yi yinamiraata baake mwasa'bi' livapina, yi purinya yinnyina, yi yi'munya pilina, yi wininya naange' yima'nyina. Wininya daza' yi sa' naangaange', yi yuyagaa' a'mwera Kwaakevaki gaai mwalyaatagaa'daasi wininya pini aawa. Sinnawi kigaakuna wininya piri' daza'bi' naanga sasara yaka mi'. ¹⁹Wininya naanga daza' yima'nyina kyiwa' anga naanga daza' davakaai dava' yima'nyina. Yi ajimya yuyangiyaraavire anga naanga sa wala'na yada yi kayaaka yinyina. Yi Gotiyai Anga naanga Babiloni dazavina simunya yawi'na yaka kaapiya waainiya' kininnakei wijaavina kyiwa' sa' yuneba nyina. Waainiya daza' yi sa' Gotiyare similika naangevine sinna tika widaya'. ²⁰Yi ahumanna yuyara likaanya mena wina, yi ayahi mugunya piri' mwaryawi. Mabiramaaryawi. ²¹Yi liviku'jizirinya naange walaabina. Yi yuyawi

sirimya pwaina pwainanyara taanga saaigilyavirebi' yina yaka. Daza sigunyavidaa'nyi walaabaka yi a'mweraavi a'ba bwala'na. Yi sahvara wana kayaaka naanga yinyina sirimyangi. Sarevidaa'nyi sirimya daza sahvaraavi kayaaka naanga yigalakiwakenna Gotiyari biraizika widina.

**Yaasiwa'na maradakunamaryade naange'
tivikita kayaa'nanya' maarake'nesi.**

17 ¹Ejeliya pwai, ejeliya ata puridaa'nyi pwaraalyara diziya ata puridaa'nyi daraalya kininnakeraaviya pwai yi sai baka niminyi dara widina “Kaaja! A'mwe yaasiwa'na marapinamaryade naange' aalya kwalaalyangi yilamwaalike' gannya tivikita kayaa'nanya' maaradevina givwaridaakude'nanyi. ²A'mwe dazasi Kwaakevakiya kingiyara girikita'nanyabwi yadivisa'. Yi a'mwe yuya Kwaakevakiyara sara kwaraji a'mwe dazavire waainiya' ye'mwannanadivisare. Yi waainiya sa' gamire girikita'nanyabwi. Yi sara yeva a'mwei biyaaya nada yimaka widevaabi' sahvara yiraataate lawalawe yima'nyina yesare.”

³Yi Kurya Tewaanyai niminyi diraginna bulamwaaina kanyiwa' ejeliya sai kwaaka a'mwera maayabanna niminyi makuna. Yi dazimagi a'mwe piri' sigyaarya wayaaka pwari munyaba yilamwaaidi'nyi nimi tinna wangamwa. Sigyaarya dazai yi sai yaya kwalaalya kininnakei gamire kilaakejiki. Yi yaya yuya daza yi Gotiyarina biraiyagaala dala pininna pininnanya. Yi sigyaaryai minyaginya ata puridaa'nyi daraalya kininnakei yaka minyagizaanya atiraalyajiyai. ⁴A'mwe daza' baazi'ma'nya kingiyaresi wayaaka nabinnanyasi wakinike' yi dala pininna pininnanya nigwilalaaka goliya kininnake', yi nigwilalaake sila nawi'nyaangeji turyaanga kwaalike'bita paidapaide yira'nadejiya'. Sa' gamire asiri yi kaapiya goliyai limwagarike'. Yi dala pininna pininnanya Gotiyare tinnyari wana butirinya winnikebwi yi a'mwe dazavire dala pininna pininnanya girike girikita'nanya yadevwi kaapiya dazari yunebanna yi'nadi'nyi. ⁵Yi gaminne yayavina gamire yamevi pikarya' wa'di'nyi. Yaya daza' yulyakiyagaalya' kininnake', yi yaya yidasa' sa' daresi. Anga Naanga Babiloni. Yaasiwa'na marapinamaryadivita yuyangi kuvinaange'. Yi Kwaakevakiya wana butirinya winnike yuyaburaavi aaya kaavilya'. Yi yaya saresi. ⁶A'mwe daza' Gotiyare tewaanyaraavi tamakadesi. Yi a'mwera Jizaazari diraginna limwaga'divi' gaminyina yune jalikurakadivisaraavi tamakina. Yi a'mwe daza' kumire tawe nada (tamakada) yimaka widaasi tinna wangamwa.

Yi nimi dazavi tinna wanganena yi lika yiwaainena atika naanga maru'na'na. ⁷Atika naanga maru'na'na kyiwa yi ejeliyai niminyi widina “Atika be'na maru'na'mwaa? Yi sawaarine yoimavajalikurakyavi aaya kaavilya' givwaridaakudeinyi. Yi a'mwe dazavinaji yi sigyaarya minyaginya ata puridaa'nyi daraalya kininnakei yaka minyagizaanya

atilyajiyai a'mwe dazavi kaanya makuvanikerinaji givwaridaakudeinyi. ⁸Yi sigyaarya dazari tinna mena wangamwaanyai yi kigaakuna sai mwalyaakei, yi dahaa' sai mamwaalyi'. Kiri' divi yi sai yirorila daanga maaya dazavidaa'nyi yidaavadelyi. Yi yilaabathei kayaaka yuya yiwina yadelyi. A'mwe Kwaakevakiyara Gotiyai Kwaakeva' wakyaaakegaa' gamire bukuya gaala mwaalya'niri kuminne yaya' myavikaryaakera. A'mwe dazara sigyaarya dazari wanganapiji sahvara atika maru'na'na. Sinnawi sai mwalyaakei, yi dahaa' mamwaalyikei, yi divi yima'naabathe' atika maru'na'na.

⁹A'mwe simunya kininnakeinyi daakaji, datha' yiniga wi'na pada'galayawirana! Minyaginya ata puridaa'nyi daraala daza mugunya ata puridaa'nyi daraalyangi. Yi a'mwe daza' mugunya dazangi yilamwaalikengi. ¹⁰Nabaai minyaginya daza kingiya ata puridaa'nyi daraalyare. Maremwaaidivisaraaviya atilyara kayaaka mena yineva (bwalareva) yi pwai dahaa' mwaalikei, yi pwai kingiya mima'naabyinanyi. Divi sai mena yima'naabozi yi sai yune maalikegaa'na nayaa mwaaladelyi. ¹¹Yi sigyaarya dazai sinnawi mwalyaakei, yi dahaa' mamwaalyikei yi gami sai kingiya ata puridaa'nyi daraai dalyalyi. Kiri' sai kingiya ata puridaa'nyi daraalyaraavine kwai yi nabaai sai yinahu yiwina yadelyi.

¹²Yi minyagizaanya atiraalyangi gimi tinna wangamwaanya, sa yi kingiya atiraalyara yima'nya'nerera. Sahvara kingiya mamwaalyaraavi. Aawa. Sahvara sigyaarya dazalyi kingiya diraginya' maapi'dere. Yi yune aawaaya piriwina (maalikegaa'na) kingiya mwaabi'dere. ¹³Dazara kumi simunya avaala pibwinanyare. Yi sahvara kumire diraginyasi kumire maremwaaalya'ne diraginyabulyi sigyaaryarina yanga wijaavipi'dere. ¹⁴Sahvara sigyaarya dazalyi gaidaa'na yipi'dera Sipizipiya Diwinyalyi mala bwa'nipi'dere. Yi nabaai sahvaraavi Diwinyai malya' nebulya'na wawilavadelyi. Sai yuya naangeraavina Naangelyi. Yi sai yuya kingiyaraavina Kingiyalyi. Sare'na sawhai wawilavadelyi. Yi nabaai Diwinyai gannyaraji mala daza' wawilapi'dere. Sahvara jaka jiwaramaa'nikera, yune gannyarahaahilakinikera, gaminyi diraginna limwaga'divisare.”

¹⁵Yi ejeliya sai niminyi widina “Gimi tinna mena wangamwaanya aalya kwalaalya daza a'mwe yaasiwa'na marapinamaryade' munyaba yilamwaalike, yi a'mwe kilaaka dala nabinyaji'jijyaraji yi kwala bwa'naanyangiyaraji yi ajimya yuyangiyaraji yagaala ge gejiyaraji sarera. ¹⁶Yi minyagizaanya atiraala dazangi tinna mena wangamwaanya yuya dazaraji sigyaarya dazalyi sara a'mwe yaasiwa'na marapinamaryadevina similika wimwaaladera gaminyi yikamaanga yima'nipi'dere. Yi sahvara sahirivi wana kayaaka yigalakapi yi gamire nigwilalaaka baazi'ma'nya marasipi'de' kannyimaaya mwaalade'. Yi nabaai gamire kilaakejikiya

miwisa tika nipi'dere. Yi dikevi yuyaji' marirapi'deziki. ¹⁷Sare' dare'nanyi. Mu'nyadivisara kwara kiri' Gotiyai kumire simunyangi gamire simunya wijaavadelyi. Yi sahwarra daza yima'nade yipi'dengi, sinnawi sai mena dake' sahiri'na. Yi sahwarra simunya gave piri'na wiwaradera, yi diraginya daza' sahwarra kingiya maremwaa'ne' maaresa' yi yuya daza sigyaaryarina wijaavipi'dere. Yi sahwarra kuna yiwopiji Gotiyai yuya yunebanna yajahaa'na gami sai dakenna. ¹⁸Yi a'mwe daza' gimi tinna wangamwaa'nya', yi anga naanga dazaba kingiya Kwaakevakiyaraavina munyawu mwaaidevera.”

Anga naanga Babiloni kayaaka yinake'nesi.

18 ¹Sangi dividaa'nyi nimi tinna wanganna yadaazi ejeliya pwai Sigunyavidaa'nyi walaabina. Sai diraginya naanga nebulya' kininnakei yi gamire byaanna Kwaakevaki livamwaja naanga yiwa'. ²Sai maangwiraaya naange' jaka diraginna dara dina

“Mena bwala'mwa'. Anga naanga Babiloni mena bwala'mwa'.
Anga naanga Babiloni saba kayaaka mena yimwa'.
Dahaa' anga saba yimakera mwaaidivisaba yima'niwa'.
Kulaka kayaa'nanya gazaizalyi saba kave mwaaidivisaba
Yuta girikita'nanya gazaizalyi kayaa'nanya gazaizalyi
mwaaidivisabane!

³Dare'nanyi. Ajimya yuyangiyara gamire waainiya' nesa'nanyi.
Waainiya diraginya sa' girikita'nanya kwalaalya nadivisasi.
Kingingi Kwaakevakiyara a'mwe dazasi girikita'nanyabwi
ye'mwannayadivisa'nanyi.
Mubiwawinya Kwaakevakiyara dazavi nigwia kwalaalya
maa'divisa'nanyi.

Dala pininna pininnanya girikita'nanya sahirivire saburi
Nigwihiraya kininnakera nigwia naangejiyara yima'nadivisa'nanyi.”

⁴Yi nimi kadika wi'nadaazi Sigunyavidaa'nyi maangwiraaya piri' yinyina. Yi sai dara dina

“Mwasilaanna dalyaabyi! Nimire a'mweihi dazavi dalyaabyi!
Gamire kayaa'nanyaji sahirisi ye'mwannemwaa'la nyipika!
Kayaa'nanyangire tivikita sahirisi giraku'nya nyipika!

⁵Gamire kayaa'nanya daza yaaye naange'bisangi.
Kuna yima'nigoda yune Sigunyavina yivani'.
Gamire yiwetawakyabwina Gotiyai mena yawiramaa'mani'.”

⁶“Pwaihi, daza' tiviki'devaabi' yinigevwina nayaa dirivikiri!
Gazabwizabwi yakenna tivikita piriwaalya nayaa
dimaragira'mwagemwaalyi!

Sa' kaapiyari aalya kayaa'nanya diraginya' ginyiwadesi.
Kaapiyarine aalya gazasa' tivikita piriwaalya' dimaragira'mwagyi!

- ⁷ Sa' yune gaminne yaya' munyaba makida
 Kayaa'nanya dala pininnanya kwalaalyabwi yadevaaiibi'
 Sarimi a'mwe savina daanga kwalaalya duzaayila!
 Yiniga wi'nanya gamire yade kayaa'nanya dazabwina
 Kale kwalaalya wijaaya'na sarimi nayaa dirivikirila!
 Gamire simunyavina a'mwe sa' dara dadesi.
 Kwiniya'nyi mwaaihe. Nimi kinginamwaalyisavi yilamwaaihe.
 A'mwei kabaloji yaanyiwaake' mwaaidevaaiibi' sasare'nyi mi'.
 Kinna javwi, taanginyabwi nyima'naabathevwi mi'. Arikewi.
- ⁸ Sarevidaa'nyi yune yirika gave pigaa'na wima'nadevulyi.
 Kayaa'nanya dala pininna pininnanya sahirivi yima'nadengi.
 Baryabulyi kinna kayaa'na jinaryabulyi mijikebulyi yima'nadevulyi.
 Gotiya Naangei maryawibwaradei wana diraginaangei mwaalike'na
 Dike' Anga naanga Babiloni savi nasi'na yadesi."

⁹ Kingiya Kwaakevakiyara sasi girikita'nanyabwi ye'mwannayadivisara gamire kwalaalya wabahilaakebura ye'mwannayadivisara kinna, jakinna dipi'dere. Jisa' kyima'noji dikevidaa'nyi yoji dike' savi winadaawoji yi kingiya dazara tinna wanganapiji yi nabaai sahwara kinna dadivi' yi kunnya kihisangi mala tannipi'dere. ¹⁰ A'mwe sahiri' daanga kayaa'nanya' kamaaroji sahwara lika naanga yipi'dere. Sare'na yi sahwara sahirivi menyaba daavapiji yi dara dina

"We! We! Anga Babiloniginyina kale neyiwa'.

Gimi anga naangebaji, anga naanga diraginyabagi!

Yune aawaaya pirivina gimire jidasa' yima'niwa'.

Gimire wagilyavina tivikita kayaa'nanya da' gima'niwa'."

¹¹ Yi a'mwe Kwaakevakiyara mubya yadivisara anga naanga dazabanna simunya yawirapiri kinna dadivi' savina yi munyi' taanginyara mwaaiibi'dere. Sare' dare'nanyi. Kumire gilyivisa ayahi mubathei aane pwai kwai mi'. ¹² Gilyivita daza yi goliyasi silivaayasi sila nawi'nyaangeji kwaalituryaangeji yi nawi'nyaanga kwaabiyivita yaakeji kwaabiyivita kingiyareji kwaabiyivita paidapaide yi'de silikaayaji kwaabiyivita wana wayaakeji yi yuya yi'naanya dala pininnanya wabatirinya kininnakeji yi yuya tinna wangadivi' wabahilaaka yadivita elapaaniyaraavire saanyaburaavi yavikaryadivisaji yita mubya naanga wakadivisa yavikaryadivisaji biraaziya kwaari'mayaginyaji sila bwaihirabwaihirata yinike kininnake yavikaryadivisaji ¹³ yi dawaryaji wabatirinya aamona' mijata purya'nesi kwaagita wabatirinya yiravayihwia'neji marazinanya dala pininna pininnanya tirinya kininnakeji saadaaya nawi'nyaji yi waainiyaji welivananya nya'neji pilawaaya girikula ya'ne nawi'nyasi wityasi yi bulimakaawoyaraji sipizipiyaraji oziyaraji oziyara mwagi'namarya'neji kilaakejisiyara a'mwe gaala kininnakeraji. Yuya daza ayahi mubipi'dera mi'. ¹⁴ A'mwe mubya yadivisara dara dipi'dere

“Tika munne daza maarya'na gimire simunya' githikaa'de yi yuya sa giminyi gyahalya'mavaka kaanya mena wiwa'. Yuya tika wapaaya nawi'nyanna nawi'nyannanya mubya naange kininnakeji gimire yuya nigwilalaaka nawi'nyanna nawi'nyannanyaji yuya sa giminyi mena gyahalya'ma'mwakengi. Nabaai gilyivita daza giminyi ayina magwaryadori a'mwera tinna mwanganyi yipi'dengi. Aawa. Arikawi.”

15 Yi gilyivita dazangi mubya yadivita dazara mubadivi' gaminyi nigwia kwalaalya maa'divisara gamire daanga kayaa'nanya' maaradevina lika naanga yapiji gaminyi menyaba daapi'dere. Yi sahwara kinna dadivi' yi munyi' taanginya mwaabi'dere. 16 Yi sara yadivi' dara dina

“We! We! Anga Naangebagingyina kale neyiwaka!

Kwaabiyivita nawi'nyangeji kingiyaraavireji wana wayaakeji

Yuya saza gimire kilaakevi paidapaide'na baazi'ma'nike'gi!

Yi sa'gi yune kilaakejiki yiwaala yiwannadi

Nigwilalaaka goliyaji sila nawi'nyaji kwaalituryaangeji!

17 Yune aawaaya pirivina gilyivikiravinakebwi gihaimwake'na we'!

Nigwia yuya dazaji nigwilalaakeji kayaaka yinyina!”

Yi sipiyavi maremwaala gazaizalyi yi a'mwe gazaizai sipiya mubada piwinna kaanya wiya'nelyi yi yuya sipiyavi yadivisaraji yi saalaalyavi a'mwe yuyara mubiwawinya kininnakeraji a'mwe dazara Bawiloni menyaba daaveva 18 dikevire jisavi sahirivi dike' winadaasiya' tinna wanganna yadivi' jake' dara danganna “Anga naanga dazaba avaaainanyaba anga naangeba gava warika!” 19 Yi sahwara kwaakevire tiryai' kunnya minyaginyangi livama'nyina yeva kinna dina yeva yi munyi' taanginya yima'nyina yeva mwaalina yadivi' jaka dina

“We! We! Anga naangebanna kale neyiwa'.

Nigwia naanga anga naanga dazabanyangine ma'daanyaina

Saalaalyavi sipiyangi kuvinimaangeina nigwihiravinakeina

yima'nadaanyainera.

Yune aawaaya pirivina kayaaka yiniwake'na we'!”

20 Sigunya'giji Gotiyare tewaanyaihilyi yi Widaasadeihilyi wi'nawijiwaakadivitaihilyi dahaa' yima'niwake'na sarimi yuyaihi yilaaya jila! Gotiyai sahirivi maryawibwaraka kayaa'nanya' tiviki'mwake'nanyi. Sariminyi yihyaka sasare dazabwi tivikisa' wiwake'nanyi.

21 Yi ejeliya diragimaraanga pwai sila pwai maarina. Aringa sila naanga witiya gila'mwadeibisai. Ejeliya sahwai sila dazai munyaba makina yaka yi saalaalyavi kewininna maralivaranna yaka yi sai dara dina

“Diraginna maralivaramwebaabi' yikamaangera maarina yapi

Anga naanga Bawiloni kewininna diraginna livarabi'devera.

Savi a'mwera tinna ayahi piriisi birawangabi'de' mi'.

22 Giminyaba piradayavire jakesi daata dadivita yagaalyasi

Gwarengireji pihuliyareji kadika ayahi gu'nipi'dera mi'.

Aawa nebulyasi. Arikewi. Aane piri' kiri' mu'nyina.

Wawinya dala pininnanyangi sidu'nakeraavi ayahi birawangabi'dera mi'.

Giminyi sasarei mwaaidoriyai aane pwai kwai mamwaalyina.

Silyare jake' witiya gila'mwadaawori ayahi gu'nipi'dera mi'.

Gimire mijike'na tika wapaaya piri' kiri' mwarina.

²³ Laamivananyavire di'baake' giminyi ayahi piri' kiri' givade' mi'.

Maangwiraaya kwala maarya'nere' maa'nya'nevire' ayahi gu'nipi'de' mi'.

Giminyaba sasareyore aane piri' kiri' mu'nyina.

Dare'nanyi. Gimire mubiwawinya kininnakera Kwaakevakiya naangera!

Ajimyaya yuyangiaraavi gimire giri'nyanna kwaasikuna wijiwaalaginya'gi!

²⁴ Gaminyi yiwetawakyaaba tawe wi'nawijiwaakyaraaviresi

Gotiyareraaviresi wari'.

Anga naanga dazaba sahwaravi yune tamakadivisaba!

A'mwe Kwaakevakiya yuyaraaviji tamakadivisaraavine yiwetawakya wari'."

Sigunyavi "Aawi!" daata dadivi' Gotiyarina yilaaya yesa'nesi.

19 ¹Sahiningi dividaa'nyi jaka naangebisa' Sigunyavi kwala naangeraavire' nimi kadika wi'nyina. Yi sahwarara dara dina

"Nemi Gotiyarine yaya' munyaba makilaa! Aaleluya!

Nemire Gotiyai yune gave sahwaraina nevadaihasamaarya'nebulyiyai!

Byaanna kininnakei diraginyabwi kininnakei yune mwaalikei!

² Dare'nanyi. Gotiyai maryawibwa'denna nebulyabwi yunewinna yida'maraangesi.

Yaasiwa'na maradakunamaryade naange' Kwaakevakiyaraavi kayaaka yigalakadesi.

Gamire girikita'nanya sabulyi sahwaravi kayaaka yigaidesi.

Sarevidaa'nyi Gotiyai sahirivi daanga kayaa'nanya'

tiviki'mwake'nanyi.

A'mwe daza' Gotiyare yaasiwa'wawinya saraavi tamakadesi.

Kumire tawe'na gannya yiwetawakya daza' tiviki'mwakesi."

³ Yi sahwarara pigasaai jaka ayahi dara dina

"Nemi Gotiyarine yaya' munyaba makilaa! Aaleluya!

Dikevire jisa' anga naangeba dike' nivani'.

Yi jita daza' munyaba yuyagaa' yuyagaa' yimanaawi!"

⁴ Yi a'mwe naanga atiziviliraai yaka pware asiri daraai daraalyaraji gaala kininnaka daraai daraalyaraji sara kwaakewinna walaruta'neva

Gotiyarina kinginamwaalyisavi mwaalikerina lotuya yina. Lotuya yina yadivi' dara dina

“Sahirisi. Nebula naangesi.

Gotiyarine yaya' munyaba makilaana!”

⁵Yi Gotiyare kinginamwaalyisavidaa'nyi maangwiraaya piri' jaka yinnigavina. Dara dina

“Gotiyare yaasiwa'wawinya yuyaihi

Gotiyarina lika yadivisaihi

Kwaakewinyaihilyi munyabanyaihilyi saihi

Nemire Gotiyari munyaba dimakilyila!”

⁶Yi kwala naangera yi'bwa'nemwaaidapiya jake'bi', saawila naange yidaa'nyiya jake'bi', yi'munya naange pidaa'nyiya jake'bi' yi nimi kadika wi'nyina. Daza' jaka dina

“Nemi Gotiyarine yaya' munyaba makilaa! Aaleluya!

Naangei nemire Gotiyai Diraginya Yuya Kininnakei

Dahaa' sai kingiya nebulyai yuna mwaalike'nanyi.

⁷Dahaa' nemire munyi' nawi'nya yina yawaaji

Yi nemi yilaaya naanga kuna yawaaji

Gaminne byaannya' munyabanna nayaa makilaa!

Yirikegaa' Diwinya Sipizipiyai kwala maarya'negaa' yima'niwa'.

Yi gamire a'mwe' gamiza' yavada'gainya yiwa'.

⁸Gotiyai savina baazi'ma'nya yaake' wijaavina yiwa'.

Baazi'ma'nya wana nawi'nya' wana livamwaja yadaasiya'

Wana tirimaaya nebulya' gannya kilaakejiki wakiwa'.”

Sare' dare'nanyi. Baazi'ma'nya yaaka nawi'nya daza' yi Gotiyare tewaanyaraavire wawinya yida'maraangengira.

⁹Yi ejeliyai niminyi widina “Yagaala datha' pikarya jitha'! A'mwe dazara Gotiyai jaka jivwaramaarakera munne naangevi Diwinyai kwala maarya'nevina biwaasara yilaaya yadivi' tewaanaanga winadere.” Yi sai niminyi widina “Yagaala daza' yi sa yagaala nebulya'nanya Gotiyarengi.”

¹⁰Sara widina kanyiwa' nimi kwaakewi gamire sivilyiraaryaba gidikusaba walaruta'nyina. Yi nimi sahwarina “Lotuya yima!” dena kiri' sai niminyi widina “Gimi sasara minna! Gimiji gimire ja'mwera kwaraji yaasiwa'wawinya ye'mwannawidaayadinyainyi. Sarimi Jizaazarina diraginna limwadivi' yi wijalikurakadivisaihilyi. Sasareihire avaiwawinyainyi. Yi Gotiyai yune gave pwainanyari lotuya nayaa diraginna ji! Sare' dare'nesi. Jizaazarina wijalikurakyabwi yi Kurya Tewaanyai wi'nawijiwaakyaraavi yidika'daa'nyi wijiwaakadivita sasare dazabulyi.”

A'mwei oziya yaakeri munyaba yilamwaalake'nesi.

¹¹Yi nimi tinna wangadaazi Sigunya' kaanya basinadaa'na yinikevi, yithaanyi, oziya yaaka pwai mwaalina. Sari a'mwei yilamwaaina.

Gaminne yaya' yi darei. Gotiyare yawita yuyangi nayaa limwaga'dei, yi nebulya'ne aaya kaavilyai. Nabaai sai yune yida'maraangebura pada'galamididevi yi a'mweraavi kotiyavi maryawibwa'da yi sai malya' bwa'delyi. ¹²Gamire tinnyai ditaalisa!. Gamire minyaginyavi kingimwaaihi'nya kwalaalya warike. Gaminne yayavine pikarya' kininnakei. Yaya dazavi aaya kaavilya' gami gave yune sahwaina yawi'delyi. Yi a'mwe pwara aawa. ¹³Gamire baazi'ma'nya yunewinna yalawakya saamigwazaaya gami wakika sa' taweve jiwinkesi. Yi sahwarine yaya' dara wo'nikesi. Gotiyare gaminyina Yagaalyala! ¹⁴Aamiya Sigunyaviyara kunnya oziya yaakeraavi yilamwaaina yeva sahwari dividaa'nyi midinna. Kumire kilaakejikaavi baazi'ma'nya yaaka wana giri'maaya nawi'nyaange yira'nevera. ¹⁵Yi oziya yaakeri yilamwaalika dazare maangevidaa'nyi kwaari'masiraminya walyaabinike!. Kwaari'masiraminya daza' saamigwazaaya' wana lika gurimaanga di'bwarakinike!. Yi nabaai dazasi sai a'mwe ajimya yuyangiyaraavi tamakade'nanyi. Yi nabaai gami sai yita aayiniyari' limwagaroji sahwaraavi diraginna maremwaaaladelyi. Nabaai gami sai sila naanga giraiyiya tima'mwanga ya'nevi waainiya' gila'mwagathelyi. Waainiya daza' yi Gotiyai Diraginya Yuya Kininnakere similika naangevine sinna tika widaya!. ¹⁶Sai gamire baazi'ma'nyavi gamire ti'munyavi gaminne yaya' pikarya yida'nikei. Yaya daza' yi dare'

“Yuya kingiyaraavina Kingiyai yuya naangeraavina Naangela.”

¹⁷Yi nimi tinna wanganna yadaazi nyilyari ejeliya pwai daavina yada yuta yuyara yiraayavi munyaba pilavamaryadaapiyaraavi maangwiraaya jaka naange' danganna. Yi sai dara dina “Sarimi yikabapi Gotiyare munne naanga dathavi dizi'bwa'nyi! ¹⁸‘Yi a'mwe baimwaasaraavi tika naana! Yi kingiyaraavire kilaakejikaaviya miwisa, yi miwita aawilasaraavi maremwaaidivisaraavireji, yi miwita a'mwe diraginaangeraavireji yi miwita oziyaraavireji a'mwe oziyaraavi yilamwaaihasaraavireji tika naana!’ dapi dizi'bwa'nyi! ‘Yi nabaai a'mwe yuya pwara kwaraavire kilaakejikaaviya, a'mwe kave mwaaihasaraavireji a'mwe yaasiwa'wawinyaraavireji yi a'mwe maalikeraavireji yi a'mwe naangeraavireji miwita daza tika naana!’ dapi dizi'bwa'nyi!”

¹⁹Yi nimi tinna wanganna yadaazi sigaarya dazalyi yi kingiya Kwaakevakiyaraji kumire aamiya aawilasara kwaraji sahwara mena yi'bwa'nyina. Sahwara “Mala bwa'naade'nana,” deva “A'mwe oziyari yilamwaalika dazalyi gamire aamiya aawilasaraaji sahwara mala ye'mwannabwa'naade'nana,” deva mena yi'bwa'nyina. ²⁰Yi'bwa'nyina kyiwaa' kiri' oziyari yilamwaalikei sigyaaryariji wi'nawijiwaakade kwaasi dadei sigyaarya dazare tinnyari yijiwaala kwalaalya yaderiji wila galyi'na yiwa!. Yi kwaasi yijiwaaide sasare dazaburi wi'nawijiwaakade kwaasiya dazai a'mweraavi sigyaaryare baave' maarevera yi gamire

a'mwa'mwe savi lotuya yevera saraavi kwaasi wiakebulyiyaraai. Sigyaarya dazariji kwaasiya wi'nawijiwaakade dazariji sara galyi'na yaka saraai gaala kuna mwaaihilyaraari di'bunya naangaangevi di'daanya naange' nivanikevi sila saalipaaya' nivanikevi kewininna maralivaranna yiwa'. ²¹Yi dazai oziyari yilamwaalika dazai a'mweraavi kwaari'masiraminya daza' gamire maangevidaa'nyi walyaabnika dazasi tamakina yakere. Yi yuta yuya dazara a'mwe dazaraavire miwisa tika maranyina yeva yi kumire munyi' yunebanna winyina.

Saataani kalavuz'a kwaram'e 1000 yi'namwaalade'nesi.

20 ¹Yi nimi tinna wanganna yadaazi Sigunyavidaa'nyi ejeliya pwai walaabina. Gamire asiri yirorila daanga maayavire kiya' limwagarikei. Yi sai kwaari'ma'magazaawanya naange' kirisi limwagarikei. ²Sai kabaraawarya dazari galalimwanna. Kabaraawarya sai kamaala wana sinnawi kigaakunanyai. Sai Yuyaraavi Kotiya Maryadei. Yi sai Saataani, Yikamaangei (Siwaakei). Yi ejeliyai kabaraawarya dazari yune kwaram'e 1000 waani taawizaniya kalavuz'a yiramwaaihya'neri kwaari'ma'magazaawanyasi wila galapwiyina yaka ³sahwari yirorila daanga maayavi kewininna maralivaranna ky'wa' sarei kewininna walaawina. Maralivaranna yaka a'badaa'nyi kaanya' sahware yilarihi'na yaka diraginna jibwekina, baave' wakina. Saataani kwaram'e 1000 bawodehaa'na ajimya yuyangiya a'mweraavi kwaasi ayina muja'neri kaanya' jibwekina. Yi divi sagaa' kwaram'e 1000 mena kabwawoji ejeliyai yiralavadelyi. Yi sai yaasiwa' yamarina yadelyi yune maalikegaa'na.

⁴Yi nimi tinna wanganna yadaazi kinginamwaalyita pini wa'di'nyiyangi yi pwara yilamwaaiha'. Sara kotiyavi maryawibwarya'neraavi Gotiyai sasare wawinyavine diraginya' wijaaawakera. Nabaai nimi tinna wanganna yadaazi a'mwe kwalaalyaraavire kuryara. Sahwara Jizaazarina nayaa jalikurakevera, yi Gotiyare yagaalya' diraginna limwagarevera. Yune sahirivine'na yikamaangera sahwareavi pwaraavire tilinnya woripuresara. Yi sahwareavi pwaraavi tamakina yesare. Yi sahware sigyaaryari lotuya myadivi' yi gamire a'mwa'mweriji lotuya mi. Yi sahware gamire baave' kumire yamengiji kumire asangiji mamaaryevera. Yi sahware balesara gaalya' ayina maareva yi kwaram'e yune 1,000 dazagaa' Kiraazitiyalyi kingiya mwaaiha'. ⁵Daza' yi a'mwera ayina dikaapi'dehaa' aaya mudi'nanyagaaki. Dazagaa' a'mwe bainika pwara gaalya' mamariwaa'. Sahwara yemwaala yiga' kwaram'e 1,000 sagaa' mena kabawojine'na. ⁶A'mwera ayina dikaapi'de aaya mudi'nanya dazagaa' sahware yilaaya yadivi' tewaanaanga winadera mwaalapiji yi Gotiyare tewaanyara nawi'nya tewaanya mwaabi'dere. Yi nabaai baryabwi sa' pigasaalya'

a'mwe dazaraavi marulawakya'ne diraginya maayasi. Aawa. Sahwara Gotiyarina mubithika yira'divisare. Yi Kiraazitiyarina yira'divisare. Nabaai sahwara kwarama waani taawizaniya sagaa' Kiraazitiyalyi kingiya ye'mwannamwaaibi'dere.

Saataanimi wawilavade'nesi

⁷Divi kwarama 1,000 waani taawizaniya sagaa' mena kabwawoji gamire kalavuziangeviya kaadihisa' kabaasoji Saataani gamire kalavuzavi yagalya'mavadelyi. ⁸Sarei mwasilaa walyaabozi a'mwe ajimya yuyangiyaraayawinna kwaasi yagaala wija'nei wina. A'mwe kwaakeviya tivimaginya dawaai dawaalyabanyara yi Kwaakevakiya yunewinyara yi Gohiyaraji Maahohiyaraji saraayawinna wina. Saataani sahwaravi mala bwa'nya'neraavi mari'bwarimwaaihadere. Kumire ata gilya saalaalyavi maangebaariya siweka sabisangi. ⁹Sarera kwaaka saba yuneba yidaawadivi' Gotiyare tewaanyaraavire wa'mwaryaba, anga naangeba Gotiyari tewaanya wivu'nivanikeba yi saba yuneba kurita gihi'mavamwaimwaaataraavinera. Kiri' dike' Sigunyavidaa'nyi walaabozi mala bwa'nadaapiya saraavi dika nakiwakeraavinera. ¹⁰Yuyaraavi Kotiya Maryadei sahwaravi kwaasi widade'na sare'na Gotiyai di'bunya naange' di'munange'na yadaa'nyiyavi sila saalipaayavi nade savi kewininna maralivaranna. Di'bunya sa' sigyaarya dazalyi kwaasi wi'nawijiwaakyabwi dade dazalyi saraai mena mwaaidakilyi dazahirivi. Sarevi daraai dala sara daanga naange' maapi'dere nyilyaviji sawisaviji yuyagaa' yuyagaa'ne'.

Naangegaa' maryawibwata naange' yima'nadevwinesii.

¹¹Nimi tinna wanganna yadaazi kinginamwaaalyita naanga yaake' wa'di'nyi nabaai namwaaalyita savi pwai yilamwaaali'. Sahwari Kwaakevasi sigunyavasi likaanya yenadaa'na yaka yimaanyina. Kirimi sawaareba kuneba. ¹²Nabaai nimi tinna wangadaazi yi a'mwe bainikera, kwaakewinyaraji munyabanyaraji sara mwaaidapiyara kinginamwaaalyita dazavire kusimagi daavina. Nabaai namwaaalyisavi yilamwaaalikei sai bukuya piningi tilaayina. Sai bukuya piriisi maarina. Bukuya si gaala mwaalya'ni. Bukuya sangi pikarya yida'nikengi tinna wanganaka kumire yeta yuya sabwina a'mwe bainikeraavi maryawibwa'mwakere. ¹³Saalaalya' gaminyi a'mwe yuya bainika mwaaihasaraavi ayina wijaavina. Nabaai Baryabulyi Bainikeraavire Angebaji sawaari a'mwe yuya bainika wilamwaaidapiya saraavi ayina wijaavina. Mena ayina wijaavina kyiwaai bainika saraavi gazaizari gamire yake yune sabwina maryawibwata yiwakere. ¹⁴Di'bunya naangevi dika nivanika savina Baryabulyi Bainikeraavire Angebaji sawaai marasi'na yiwakelyi. Di'bunya naanga daza' barya pigasaalyasi. Ayawidaa'nyi balyasi daza'.

¹⁵Nabaai Naanga maryawibwa'dei a'mwe pwarine kwarine yayavi bukuya gaala mwaalya'ne siri mabiranganyoji sarevi, yithaanyi, a'mwe sari marasi'na yiwa' di'bunya naanga dika nivanikevina.

Sigunya mudikevakinaji Kwaaka mudikevakinaji dinike'nesi.

21 ¹Yi nimi sigunya mudikevasi Kwaaka mudikevasi warikewaai wangamwa. Sare' dare'nanyi. Sigunya aayagaasiyavasi Kwaaka aayagaasiyavasi yunakaanna wina. Nabaai saalaalya' kirisi mwarina. ²Nabaai nimi tinna wangamwa anga tewaanya dazaba Jeruzaalemi mudikeba. Anga naanga dazaba Gotiyai yasaabina kyiwa' Sigunyavidaa'nyi anga daza' walaabina. Nigwilalaa'baaka nawi'nyajiya', a'mwe' kwala maarya'ne' nigwilalaaka nawi'nyaange tida kwala maa'nya'negaa' gannya a'mwerina yemwaaidevaaibi' walaabina. ³Sare' nimi kadika wi'nyina yadaazi kinginamwaaalyisavidaa'nyi maangwiraaya piri' yinyina. Yi jaka naanga diraginna dara dina “Yithaanyi! Dahaa' Gotiyare seli ange' a'mweraji ye'mwannamwaalika! Sahwaraavi tinnyaba waradesi. Yi gamire byaannya' kuminyi ye'mwannarika! Nabaai sahvara gami sahwarera mwaaibi'dere. Yo, Gotiyai gami kwalyi ye'mwannamwaaladelyi. ⁴Kumire kidalaaibirika tinnyaraavi wiwarike gazasa' yaalika yimwagathere. Baryabwi ayahi waradevwi mi'. Yi a'mwera ayahi baibi'dera mi'. Simunya' taanga ayahi winadera mi'. Jakinna ayahi dipi'dera mi'. Daangeji maapi'dera mi'. Sinnawinya sa mena yuya yiwina yiwake'nanyi.”

⁵Kinginamwaaalyita dazavi yilamwaaalike sai dina “Yithaanyi! Nimi yuya sa mudike yavikarivanigengira.” Sara daka piri' dina “Yagaala daza pikarya jithaka! Yagaala daza yuyara diraginna limwabizannaji naanga nebulya'nanya warike'naji sara jithaka!” ⁶Sara daka niminyi ayahi widina “Yuya sa mena yima'niwaabikengi. Nimi sahwainyi, nimi aaya sinnawinyainyi (A). Aaya divineinyi (Z). Nabaai yuya sangine'na aaya kaavilyainyi. Yuya diraginya sa yunebanna yi'mwannadinyainyi. Nimi sahwainyi a'mwe aalya'na mijika baimanikerina aalya yanga naanga wijaaavidelyi. Aalya sa' nade'na aaliyiminnyavi gaala mwaalya'ne'. Nimire yanga naanga dazabwi sihumale yanga wijaaavidelyi. ⁷Nabaai a'mwei mala bwa'nyaburi yunebanna wawilavajai yi nimire yanga naanga daza' maaradelyi. Ganimaangei gannya kaimiraayaraavina wijaaavadevaaibi' dathavwi maaradelyi. Nimi gaminyi Gotiyainyi mwaalidelyi. Nabaai sai niminyi nyibwaaalivaangei wimwaaihiwijai mwaaladelyi. ⁸Kiri' a'mwera lika yina Kiraazitiyarina 'Aala! Nabaimudika!' dina ayina ginyira'divisaraji a'mwe diraginna malimwagaryadivisaraji a'mwe girikita'nanya dala pininna pininna yadivisaraji a'mwengi a'mweraavi tamakadivisaraji a'mwe ata limwadivisaraji a'mwe giri'nya yadivisaraji a'mwe kwaasigotiyaraavi lotuya yadivisaraji a'mwe yuya kwaasi yagaala

dadivisaraji sara kuminne tivikita daresi. Di'bunya naangevi sila saalipaayavi di'munange'na yarikevi sahwaraviva marasi'nadere. Sa' yi Baryabwi Ayawidaasasi.”

⁹Ejeliya pwai, ejeliya ata puridaa'nyi daraalyara diziya ata puridaa'nyi daraalyangi maangengi a'mweraavi kayaaka yigalya'ne yeku'naka aaya kininnakerajiya pwai, yi sai baka niminyi dara widina “Kaaja! Kwala maa'nya'ne sidiraaya' Sipizipiya Diwinyarine a'mwewina givwaridaakude'nanyi.” ¹⁰Sara widina kanyiwa' yi Kurya Tewaanyai niminyi diraginya yivaimwanna kanyiwa' ejeliya sai mugunya naanga ke'mwewinya pirivina niminyi makuna. Sara nyaka Anga Naange' Jeruzaalemi Nawi'nya dazaba yibwaridaakuna. Anga daza' Gotiyai yasaabina kyiswa' Sigunyavidaa'nyi anga daza' walaabina. ¹¹Gotiyare byaanna naange' anga naanga dazaba mwadaavina. Savire baaka wanyiwanya' yuna nabinya piri'bisa' wanyina, sila nigwia naanga mubadivita sangire baaka sa'bi' wanyina. Yi daza' sinimwavanahurika naangebisa', yi wana tirimaaya nebulya'nanya' sigujaaka sirimya'bisa' wanyina. ¹²Anga naanga dazaba sikurita naanga yinike' yune ke'mwewinanya'. Kurita savi tikurya atiraai sivilyiridaa'nyi pwaraalya warina. Sare' nabaai tikurya pirivi ejeliya pwai aya kiba gidaa'na. Pirivi pwai, pirivi pwai gidaa'na. Yi yuyangi ejeliya atiraai sivilyiridaa'nyi pwaraalyara aya kiba gidaa'na. Nabaai tikuryangi Yizireliyaraavire yisavaakidaa'nya atiraai sivilyiridaa'nyi pwaraalyavakaavine yaya pikarya yida'nikengira. ¹³Sikurita nyilyai bilyiri'dimagi kaadihita dawaai dasa' daavina. Nabaai sikurita pimaginyavi kaadihita dawaai dasa' daavina. Nabaai sikurita nyilyai walakadimagi kaadihita dawaai dasa' daavina. ¹⁴Sihurita anga naanga dazabanne sa' kaavilyawi sila diraginya yivaimwagya'ne atiraai sivilyiridaa'nyi pwaraalya kininnakesi. Nabaai sila saraavi Sipizipiya Diwinyare Widaasade atiraai sivilyiridaa'nyi pwaraala saraavine yaya kininnakengira.

¹⁵Ejeliya dazai nimiji yagaala ye'mwannadina yivanikei yita goliyaginyari' limwagikei. Anga naanga saba kaadihisangiji sikurisaviji yaamijiyita ya'neri' limwagikei. ¹⁶Anga naanga dazaba yuna girila'nya yivanika. Gamire saaminyavasi gamire naangevasi yuyavakaai avaainanyavakaalyi. Sahwai gamire yisarisi yaamijita yina kyiswa' anga naanga sabanya saaminyava' sitethiya tiwelivi taawizaniya yima'nyina (2,400 kilomitaaya). Saaminyavasi sikurisaviya naangevasi anga naanga dazabanne yunebanya' munya ke'beva yilaawina yinikebaji yunebanya yuya sa avaainanya. ¹⁷Nabaai sikurita kiriviji yaamijita yina yiwake' sikurisa' yune angajina 144 kyuvitiya (72 mitaaya) yima'nyina. Metaaya daza' a'mwera yuyangi metaayimiya yadivisa' avaalyasi. Ejeliyai yaamijiyita sa' sikurisavi yune metaaya sahirisina yiwakesi. ¹⁸Anga

naangebanya sikurisa' Gotiyai sila nawi'nya jaazipaayasi yavikaryakesi. Nabaai anga naanga saba yune goliyasina yavikaryakebe. Sarevi anga naanga saba sinimwavanahurike'bi' bwamwadiwina. ¹⁹Anga naanga saba sikurikevi kaavilyawi sila nawi'nya dala nabinabinya nigwia naanga mubadivisaji Gotiyai yiwaala yiwagakengi. Aayagaasa (1) sila nawi'nya sikurisavi kaavilyawinyai jaazipaayai. Nabaai yawidaa'nyai (2) sila gwaagwaaja sapaayai. Nabaai daraai dalyai (3) sila ahetyai. Nabaai daraai daraalyai (4) sila yikiwa'ja emeraliyai. ²⁰Nabaai atilyai (5) sila wayaakejisi yaakejisi warike saathonikiziyai. Nabaai ata puridaa'nyi pwainanyai (6) wayaaka tawaja konyiliyaniyai. Nabaai ata puridaa'nyi pwaraalyai (7) sila awi'ja kirizolaaitiyai. Nabaai ata puridaa'nyi daraai dalyai (8) sila saalaalyavi yijuza beriliyai. Nabaai ata puridaa'nyi daraai daraalyai (9) sila nabinnanya awi'ja topaaziyai. Nabaai atiraalyai (10) sila yikiwa'jajisi awi'jajisiyai kirizopirezai. Nabaai sivilyiridaa'nyi pwainanyai (11) sila nabinnanya gwaagwaaja aayazidiyai. Nabaai sivilyiridaa'nyi pwaraalyai (12) sila nabinnanya wayaaka ametiziyai. ²¹Kaadihita atiraai sivilyiridaa'nyi pwaraala sa nabaai kwaaliturayaanga mubya naanga yadivita sivilyiridaa'nyi pwaraalyangi. Kaadihita gazasa' yi sa' kwaaliturayaanga naanga yune pirisina yavikarinikesi. Anga naangeba tuta yuyangi yune goliya'nanyasi. Goliya giri'maaya' widiwaayavire gilaaziya'bisasi.

²²Anga naanga dazavi Gotiyarine Anga nawi'nya' tinna mwanganyiwa. Mamannyika sare' dare'nesi. Naangei Gotiyai Diraginya Yuya Kininnakei, yi Sipizipiya Diwinyalyi Gotiyarine Anga nawi'nyasi. Gazabazaba yilaaya wiadivisa'nanyi. ²³Nabaai anga naanga dazaba wanyiwanya ya'na nyilyalyi lawelyi saraarina wigainadeva mi'. Sare' dare'nesi. Wanyiwanya yune naanga Gotiyare'na wannadevanna anga saba. Yi gamire byaannya' wannadeva. Nabaai Diwinyai sahibanne wanyiwanya di'baakelyi.

²⁴A'mwe ajimya yuyangiyara anga naanga dazabadaa'nya wanyiwanya baakevi kaanya yamaripi'deve. Nabaai kingiya Kwaakevakiyara sahibanne kumire nigwilalaakeji byaannyaji makabipi'deve. ²⁵Yirikegaa' sikurita saviya kaadhisangi kaanya tihipi'de mi'. Arikewi. Yuyagaa' basinadaa'na yade. Sare' dare'nesi. Anga naanga saba sawisa' jinnadeva mi'. ²⁶Sahibanna ajimya yuyangiya byaannyaji yaya munyaba makilya yuyabulyi makwibi'dengi. ²⁷Gilyivita giri'naka aane piri' kiri' wilade' mi'. Gotiyare tinnyari wana butirinya winnikebwi yade aane pwai kwai aane piri' kiri' wiladei mi'. Kwaasi yagaala yade aane piri' kiri' aane pwai kwai wiladei mi'. Arikewi. A'mwe kumire yaya bukuya gaalya'nyiri Diwinyare bukuyiri yida'nikera, yune a'mwe dazahwarana wibi'dere anga naanga dazabanna.

22 ¹Nabaai ejeliya dazai aalya naange' walyivanika pirivina niminyi yibwaridaakuna. Aalya daza' aalya gaala'ne sa' yuna

sinimwavananya'bi' aaziya'bi' kimihita yadaa'nyiya'. Yi aalya daza' Gotiyalyi Sipizipiya Diwinyalyi sanidaare kinginamwaalyita savidaa'nyi yima'naka ² anga naanga dazabanna tutaanya naangevi tinnyaba walyuna. Aalimaangebaari dihiriji kengihiriji yita gaala ya'nyi' waayi'. Kwarama pirivi tika munne atiraai sivilyiridaa'nyi pwaraai yi'nadengi. Yuya lawe sikaavi yisila daza yi'nadengi. Nabaai yita sare yikiwasa ajimya yuyangiyaraavi tewaanya nawi'nya yima'nya'nengi. ³Nabaai Dikevi wimarasinyane gazasa' kunebe. Yuya daza ayina warade mi'. Gotiyalyi Diwinyalyi sanidaare kinginamwaalyisa' anga naanga dazaba waradevanyi. Nabaai Gotiyare yaasiwa'wawinyara gaminyi lotuya wimaripi'devanyi. ⁴Nabaai gamire sinnyi' wangabi'devanyi. Nabaai gaminne yaya' kumire yamenginyira. ⁵Sawisa' ayahi jinnade' mi'. Sarevi nabaai sahwarraavi laamivananyavire baakesi nyilyare baakesi sawaarina ayahi wigainade' mi'. Naangei Gotiyai sahwarraavi baake' wijaavade'nanyi. Nabaai yuyagaa' yuyagaa' sahwarra kingiya mwaabi'devanyi.

Jizaazai walaabatherinesi.

⁶Nabaai ejeliyai niminyi dara widina “Yagaala yuya daza yuna naanga nebulyangira. A'mwe yuyara sahinigina diraginna limwabizangi. Naangei Gotiyari wi'nawijiwaakadivisaraavire kuryaraavi dihaa'bwa'dei gamire yagaalya' wijiwaakya'na gamire ejeliyari maryasaabakelyi. Gamire yaasiwa'wawinyaraavi wibwaridaakwia'na yuya daza yime'nya'bi' yima'nya'nenna maryasaabakelyi. ⁷Yithaanyi! Nimi yime'nya'bi' walaabideinyireva.’ A'mwei yagaala bukuya davi warike midinajai yi yagaala Gotiyai githiwake wi'nama'mwaanya wi'nawijiwaakiyagaala daza midinajai yi a'mwe dazai yilaaya yada tewaanaanga winadelyi.”

⁸Joninnyi yagaala dazahini kadika wi'nena yuya dazahini tinna wangamweinyi nimi. Kadika mena wi'nena tinna mena wanganena “Sahwari lotuya yima!” dena kwadaai gilina yena ejeliyare sivigi'nyiryawi yuya daza nyibwaridaakwakeryawi walamwaaina. ⁹Mena walamwaaina kywa sawai niminyi widina “Gimi sasara minna! Gimiji gimire ja'mwera kwara wi'nawijiwaakadivisaraji ye'mwannawidaayadinyainyi. Avaaiwawinyainyi. Nabaai a'mwe yuyara bukuya davire yagaalya mididivisaraji avaiwawinyainyi. Yi Gotiyai yune gave pwainanyari lotuya nayaa diraginna ji!” ¹⁰Nabaai sawai niminyi widina “Gotiyare yagaala daza kadika wi'nama'mwaanya wi'nawijiwaakiyagaala daza bukuya dathiri warikengi mamarabiku'dinnera! A'mwera wangabika! Sare' dare'nanyi. Gotiyare daza ya'negaa' aya kigaa' mena yiwaka. ¹¹'Aayagaa' sagaa' a'mwei yida'maraangebwi marasi'nikei kayaa'nanyabwi yadei

kayaa'nanyabwi kuna yana! A'mwei kayaa'na girikita'nanyabwi yadei kayaa'na girikita'nanyabwi kuna yana! Nabaai a'mwei tewaanya yida'maraangebwi yadei tewaanya yida'maraangebwi kuna yana! A'mwei nawi'nyai giri'maayai mwaalajai nawi'nyai giri'maayai kuna mwaalaneva!' ¹²Yithaanyi! Nimi yime'nya'bi' walaabideinyira. Nimore tivikisabwi limwaga'muji walaabideinyi. A'mwe gazarizari gamire yade yune saburine'na wirivikirideinyira. ¹³Nimi aaya sinnawinyainyi (A). Aaya divineinyi (Z). Yi nimi yuya sangine'na aaya kaavilyainyi. Yuya diragina sa yunebanna yi'mwannadinyainyi.

¹⁴A'mwera kunnya baazi'ma'nya aalya yipijara yilaaya yadivi' tewaanaanga winadere. Sarera "Tika munne yita gaala'nyiki yiniga maranaana! Anga naanga dazabanne kaadihisangi yiniga wilawaana!' deva yipinerera. ¹⁵Gotiyare anga naangeba mwasilaa jilikeraji a'mwe giri'nya yadivisaraji kayaa'nanya girikita'nanyabwi yadivisaraji a'mweraavi tamakadivisaraji a'mwe silaangeraaviji yisaraaviji kwaasigotiyaraaviji widadivisaraji gazarazara kwaasiyabwina wivu'nadera kwaasi yadivisaraji a'mwe dazara mwalibainyina yipi'dere mwasilaa. Anga nawi'nya savi wilaabipi'dera mi'."

¹⁶"Nimi Jizaazainyi nimore ejelijari sariminyawinna yihimaryasaabiwa. Niminyine kusilaanyangiya anga geva gevanyaihirina yagaala daza jalikurakya'neri yihimaryasaabiweinyi. Nimi sawainyi Yita Devitimi aaya kaavilyavi pwipulyainyi. Nimi gamire Kaimiraayainyi. Nimi silingaamina yirikwinyagaa' livamwaja yade' kaabwe sahiri'nyi."

¹⁷Kurya Tewaanyalyi Sipizipiya Diwinyare sidiraayasi sawaai dina "Kaaja!" A'mwei yagaala daza' wi'noji sai dara dana! "Kaaja!" Nabaai a'mwei aalya'na mijika baloji sai bana! "Aalya' nima!" yawiroji aalya gaala'ne' Gotiyare yanga naange' bamaarana!

¹⁸Nimi yagaala diragina' widivanige. A'mwe gazaizai Gotiyare wi'nawijiwaakiyagaala daza bukuya diri warike kadika wi'nivanikeri diragina dara jalikurakivanige. Saigi yagaala dazangina yagaala piri' mije'mwamwiya yijaigi bukuya dathiri wana kayaa'nanya daza kayaaka yigalya'nenna yida'nike sa Gotiyai giminyi mije'mwamwiya gyatheiginyi. ¹⁹Nabaai bukuya diri Gotiyare wi'nawijiwaakiyagaala dazangi yagaala piri' marasi'nijaigi Gotiyai giminyi gamire nawi'nyaanga bukuya dathiri yida'nikenna gimarasi'nadeigi. Yi sasareigi giminyine yita gaala'ne siki tika munne dimaranadeigi mi'. Yi sasareigi anga naanga nawi'nya dazaba yiniga wi'na dimwaaideigi mi'. Aawa. Dazaburi gimarasi'nadeiginyi.

²⁰Yuya dazanna jalikurakivanika dazai dahaa' dara dina "Yayo, nimi yime'nya'bi' walaabideinyira!"

Sahirisi. Nebula naangesira. Naanga Jizaazai dalaama!

²¹Yanga gaimwanga naanga Jizaazare' sarimi yuyaihilyi yihye'mwann amwaalana!